



12359

隨園詩話補遺卷一

倉山居士著

朱緒言

詩始于虞舜編于孔子吾儒不奉兩聖人之教而遠引佛老何耶阮亭好以禪悟比詩入奉爲至論余駭之曰毛詩三百篇豈非絕調不知爾時禪在何處佛在何方人不能答因告之曰詩者人之性情也近取諸身而足矣其言動心具色奪目其味適口其音悅耳便是佳詩孔子曰不學詩無以言又曰詩可以興兩句相應惟其言之工妙所以能使人感發而興起倘直率庸腐之言能興者其誰耶

李玉洲先生曰凡多讀書爲詩家最要事所以必須胸有萬卷者欲其助我神氣耳其隸事不隸事作詩者不自知讀詩

詩話補遺卷一

者亦不知方可謂之真詩若有心矜眩淹博便落下乘

又有人問先生曰大題目用全力了却固見力量倘些小題亦用長篇豈不更見才人手段先生笑曰獅子搏兔必用全力終是獅子之愚

同一樂器瑟曰鼓琴曰操同一著述文曰作詩曰吟可知音節之不可不講然音節一事難以言傳少陵羣山萬壑赴荆

門使改羣字爲千字便不入調王昌齡不斬樓蘭更不遣使改更字爲終字又不入調字義一也而差之毫釐失以千里

沈雲椒侍郎未過時館于陳梅岑家其時梅岑尙髫也然梅

岑詩筆清新實爲先生傳授諺云開口乳要喫得好此之謂

也梅岑常誦先生子曰秦淮云菖蒲綠映石榴紅兕盎東西

坡幾叢不辨誰家妝閣底遠山多在畫屏中闌干影裏綺疏橫
杖酒齊酣笑語迎樓上衣風樓下水一簾香霧不分明丹
符風颭佛幡如扇影參差漾碧虛一片湖光星萬點家七水
閣上燈初柳陰檻外泊船頭都向尊前聽短謳却到中流清
景好蔣王山上月如鈎晚過楓橋云雨不成絲柳帶烟暮天
遠水正無邊客愁最怕鐘聲攪不向楓橋夜泊船泛舟城北
云最是長條柳依依一愴情蘆花猶未白已解作秋聲

鄭幾尺先生咏鏡云朱顏誰不惜白髮爾先知可謂佳矣後
聞俞鶴齡秀才咏鏡有白髮朱顏管一生七字尤佳其妙處
在一管字

趙雲松過蘇小墳云蘇小墳鄰岳王墓英雄兒女各千秋孫

詩話補遺卷一

二

九成過琵琶亭云爲有琵琶數行字荻花楓葉也千秋句法
相似

近日有巨公教人作詩必須窮經讀注疏然後落筆詩乃可
傳余聞之笑曰且勿論建安大歷開府參軍其經學何如只
問關七雕鳩采卷耳是窮何經何注疏得此不朽之作陶
詩獨絕千古而讀書不求甚解何不讀注疏以解之梁昭明
太子與湘東王書云夫六典三禮所施有地所用有宜未聞
吟咏情性反擬內則之篇操筆寫志更慕酒誥之作遲遲春
日翻學歸藏湛湛注水竟全大誥此數言振聾發聵想當時
必有迂儒曲士以經學談詩者故爲此語以曉之

人問杜陵不喜陶詩歐公不喜杜詩何耶余曰人各有性情

陶詩甘杜詩苦歐詩多因杜詩多創此其所以不合也元微
之云鳥不走馬不飛不相能胡相識

宋人漁父詞云歸來月下漁舟暗認得山妻結網燈又云不
愁日暮還家難得芭蕉出董籬二語相似余寓西湖德生庵
夜深斷橋獨步常恐迷路緊望僧庵燈影而歸方覺二詩之
妙

凡菱笋魚蝦從水中采得過半個時辰則色味俱變其爲菱
笋魚蝦之形質依然尙在而其天則已失矣諺云死蛟龍不
若活老鼠可悟作詩文之旨然人莫不飲食也鮮能知味也
作者難知者尤難

尹文端公出將入相垂四十年常謙謙然不自喜惟小妻張

詩話補遺卷一

三一

氏以所生女入宮爲 皇子妃 誥封一品夫人逢人必夸
故紀 恩詩曰瑞日幢隴展翠屏環階拜舞祝 慈寧爭傳
王母瑤池會竟見仙班列小星

余屢覓同年楊兼山大琛 詩不得今年到蘇州得其古香堂
詩稿秦宮云五丈旗飄復道寬曉粧人試綠雲盤虛懸昭膽
秦宮鏡不見長城白骨寒舟中云斷雲作意橫遙領明月多
情送短篷最愛風標兩公子一生消受綠蘆風又春衣典盡
還賒酒鶴俸分來又買花皆駘蕩可意

庚申初春余與兼山及諸同年在京師遊陶然亭兼山次壁
間田退齋少宰韻云欲雨不雨春晝陰城南亭子同登臨書
痕消盡葦根出聲響斷時禽語深且喜僧寮無俗韻漫將

迹託沉吟丁香幾樹才含蕊記取花時策杖尋兼山晚年寵
妾與夫人反目余戲之曰君可記四十年前贈內詩平兼山
請誦之曰百杵午窗頻擣藥一燈子夜尙縫衣此與唐明皇
王夫人脫阿忠半臂作生日何殊讀之可作回心院矣兼山
笑而不答田少宰諱懋山西相公從典之子立朝有聲

杭董浦論七律不喜拗體余道詩境甚寬實有因拗轉峭者
因誦倪紫珍先生客中憶西湖云江水不如湖水澄南峯涼
暖時堪登入雲但問采樵客踏葉偶隨歸寺僧一掬泉因瘦
蛟活滿山桂與青雲然白波渺々未可渡空倚葛陂三尺藤
似此八句一調平仄便索然無味矣杭亦以爲然先生官御
史古貌清標識余于未第時余學寫殿試卷先生教以偏旁

一詩話補遺卷一

四一

點畫致足感也記其渡江遇風云越陰已夙戒涉波復新懦
忽然馮夷怒葉舟竟掀播命祇此毛輕心已拚旣破且守柁
檣立獨抱忠信臥須臾洪濤平白鷗浮一箇在試院中答厲
衣園侍郎云文入彀中須賞識棋子局外易分明贈丹桂云
老幹十年看獨立丹心一點早平分其存心之公正可想宿
瀟溪云避風先泊岸過雨更觀欄皆妙先生名國連李謹墀
芝遊靈隱寺雲林大師出示石軍感懷札紙墨殘缺如裂春
冰又出山谷襄陽二札李題云玉印何時勤貞觀十五年不
多完筆墨一半補雲烟稀世無人信名山有佛憐我來長跪
讀深幸見殘箋觀梅云步步梅花裏遲遲過石梁兩山清澗
合一路白雲香偶約探春侶同登選佛場羨他修得到愧我

半生忙又顧我忽無影前峯落照微十字亦超

余遊武夷至大藏峯望半空山穴中有橋板梁柱大小百千
根參差雉架灰墨色長短不齊既不朽爛又不傾落其下湍
急舟難停泊有某官擊以烏鎗落木柿數片朱子云是堯時
民避洪水居此水平時人下而木存想亦有理余還杭州後
與孫景高世講談及之亦出所藏虹橋板一片長尺許薄三
分云得自張芑堂張又得于吳達夫梁山舟題云虹橋之板
長徑尺付與幽人鍾玉格延陸家藏東海題題處天然一角
白書不可信字可傳非松非柏無人識卽今散落在塵中君
獨何緣收拾得當年吹噓武夷峯仙凡恂恍將毋同須叻一
夜風霜起飛上青天化斷虹古人題云虹橋遺迹倩誰搜千

詩話補遺卷一

五

載猶看片板留莫道仙踪渺難問有人曾向武夷遊九曲環
溪鎖翠烟仙風吹墮幾何年題來好句尤珍重慰我平生嗜
古緣

人餽得心大師雜子四十師大吞咽人笑之師作偈云混沌
乾坤一口包也無皮血也無毛老僧帶爾西天去免在人間
受一刀

金陵山川之氣散而不聚以故土著者絕少傳人王謝渡江
多作寄公亦復門戶不久此其証也然街衢宏濶民氣淳靜
至今士大夫外來者猶喜家焉桐城姚姬傳太史掌教鍾山
有移居之志賦詩云又向金陵十日留依然雙闕望牛頭交
遊聚處思移宅衰病行時愛掉舟蕭寺風多疑作雨後湖烟

淡總如秋僧書擬共舒于讀不弔興亡惹淚流余謂第四句尤合余意余當衰時亦喜舟行畏陸行也

太史七古雄厚惜篇長難錄錄其岳陽樓見月云高樓深夜靜秋空蕩蕩江湖積氣通萬頃波平天四面九霄風定月當中雲間朱鳥峯何處水上蒼龍愁未終便欲拂衣瓊島外止留清嘯落湘東弔王彥章云亂世鳥飛難擇木男兒豹死自留皮笑劉耕南云別來書到長安少死去才教天下空淮上云只愁天上桃花水浸尖淮南桂樹山釣台云可憐高鳥盡回憶釣魚磯皆絕妙也亡已歲余中秋夜渡江云世上夜深秋正半江心風定月當中亦與先生岳陽三四聯相似先生從父南青諱範在長安與余有車笠之好學問淹博而不喜

可詞話補遺卷一

吟詩余改官江南送行詩麻集而南青無有也余調之云南青愛人如老姬初入翰林殊栩栩平時著述千萬言臨別贈我無一語

聞秀吾浙爲盛庚戌春掃墓杭州女弟子孫碧梧邀女士十三人大會于湖樓各以詩畫爲贄余設二席以待之徐裕馨相國文穆公之孫女也畫法南田詩吟中晚卽景云讀罷黃庭卷嬾開靜中消思費推裁吹燈欲禁花留影剛捲珠簾月又來暮秋云寒蝶低飛月滿枝海棠紅冷桂凋時笑儂竟比黃花瘦青女多情知未知畫眉云柳梢枝上曉風柔夢醒雕欄語未休莫向碧紗窻畔喚美人猶是未梳頭暮春云殘紅片片卸簷前樹有餘香蝶尚憐士女不來芳草外鞦韆猶繫

綠楊邊中庭風靜遊絲落繡以簾垂紫燕穿恰好送春詩未
就瑤台有妹贈雲箋夜雨云夜雨小窻多少春喚子規去了
起來收拾餘花又把五更風惱

汪妯字巽爲號順哉秋御先生之女也春日山居云山居無
事起常遲不斷溪聲雨過時最愛學飛新燕子簾鉤低拂影
差池聞蟲云四壁亂蟲鳴聞聲暗自驚獨憐秋一色可奈月
三更嘆息余如助丁寧夢未成可知爲客者緣爾倍閱情秋
月云古戍鳴寒折孤城急暮砧俱饒有唐音

孫春巖觀察滇南娶姬人王氏名玉如善畫工詩與女公子
雲鳳雲鶴閨房唱和有林下風喜弟自滇至云旣見翻疑誤
凝眸各審詳九年雲出岫一夕雁成行別後滄桑換途中歲

詩話補遺卷一

七

月長舊容驚半改鄉語歎全忘對月秋垂淚曉猿夜斷腸逢
人間消息竟便寄衣裳剪燭心方慰回頭意轉傷自余離故
土賴爾奉高堂感逝餐應減思兒鬢恐霜弟能文救水妹可
護溫涼間已調琴瑟曾無弄耳璋當年送我處今日遇君場
彼此皆如夢依依兩渺茫此詩置白太傅集中幾不可辨
錢塘陸飛字後飲訖隆乙酉解元性高曠善畫工詩慕張志
和之爲人自造一舟妻孥茶竈悉載其中遨遊西湖以水爲
家揚州遇雪云雨隨微霰集船與斷冰爭渡錢江云萬弩尙
餘沉鐵在羣山渾欲勒潮回爆竹云緼袍易裂拋宜遠濁酒
能醒近未妨

近來習尙丈夫多臂纏金鐲手弄椰珠余頗以爲嫌而譁厚

者亦復爲之陸作詩刺之云我聞遠賈多艱虞纏金或以資窮途途窮未必非懷寶慢藏亦足來萑苻世人金多揮不足舉袖滿堂黃映肉指環臂釧乃女子男化女兒何日始南方草木椰最久實大如瓜漿作酒何年落子比元珠一串摩尼時在手有手不弄琴與書有手不把犁與鋤可惜白日空摩挲不有博奕猶賢乎

余嘗求陳望之先生詩而不得詩話中所載甚少近日王夢樓從楚中歸誦其月夜登黃鶴樓云丹樓天外峙皓月空中行銀濤與玉魄相迸出光明樹暗漢陽渡雲低鄂渚城不知何處笛解作落梅聲泛舟登伯牙台云伯牙台畔曉鶯飛梅子山前綠漸肥舟共鳧鷖聊泛泛柳遮樓閣似依依人琴千古

詩話補遺卷一

八

古知誰在江漢殘春照鬢稀我欲臨風彈一曲落紅成陣亂斜暉

丙辰召試者二百餘人合五十五年矣存者惟錢籜石閣學與余兩人耳庚戌五月相訪嘉禾則已中風半身不遂年八十有三猶能醞醢清談家徒壁立賣画爲生官至二品屢掌文衡而清貧如此真古人哉刻籜石齋詩集四十九卷最後題春圃弟茶舫圖云清涼山後阿兄題大令名看小令齊三月柳遮江路永十年人隔夕陽低拳拳念舊蓋物稀爲貴理應然也先生吟詩多率真任意有天子自道之樂其村居云村居誰爲閉門高夜雨頻添水牛篙楊柳初絲亞文杏木蘭如玉照櫻桃王官谷小雲同住華子岡深犬夜噪短杖一枝

扶使出西軒北陌又東臯先人別業云屋于高處非忘世志
欲終焉此讀書皆有駢宥之致先生名載嘉興人

家常語入詩最妙陳古漁布衣咏牡丹云楼高自有紅雲護
花好何須綠葉扶 國初徐賈時寄妾云善保玉容休怨別

可憐無益又傷身

秋霜初下木葉未凋而浮萍先悴松江張夢喈之女玉珍有
句云梧陰尙覆階前草秋信先殘水面花雖眼前景無入道
過又贈歸燕云空巢爲汝殷勤護重到休迷故主樓真仁人

之言 玉珍嫁太倉秀才
全糊有孝子之稱

凡攻經學者詩多晦滯獨蘇州江鄭堂 藩詩能清拔王蘭泉
司寇之高弟子也登齊雲山云危梯高百步曲折徑通幽人

詩話補遺卷一

與鳥爭路僧邀雲住樓山收千里翠石放衆溪流空際聞鐘
磬聲從何處求寓樓云東風料峭覺衣單樓閣虛空夢未殘
病裏已教花事去愁來肯放酒杯寬畫圖勸客看山色書卷
留人忍夜寒去歲家書今歲達老親爲我定加餐送蘭泉從
方伯升司寇入都云民情愛冬日朝命轉秋官御何工切

余十二歲受王交河先生蘭生知入學十五歲受李安溪先
生清樞知補增十九歲受帥蘭皋先生念祖知食餼感知已

之恩求王李二公詩不可得近在汪松蘿清詩大雅中得帥
公春園云羣香多撲鼻空翠總沾衣良以得春趣因之忘世

機徑幽當曉寂禽小見人飛我意適如此看雲何處歸又秋
信云柳殘池受月花落徑添泥彈琴云耳邊猶有韻空外絕

無聲

彭湘南布衣與陳滄洲先生同鄉交好陳歿後無所依歸以選詩爲生癸酉來金陵年七十餘矣杖頭挂古錢數枚朱履白髮招搖過市爲余言滄洲詩宗少陵誦其石峽看月云薄暮村難辨依微古渡旁空江懸網罟落日下牛羊水落灘聲緩山高樹影涼驕驛看月色夜久漸爲霜他如夜雨隣燈舟似市經年旅泊水爲家竹榻耳隨天籟寂紙窗雲共佛香飄皆佳

松江提督張雲翼以公侯世職而嚴灘一首獨出新裁其詞云漫整荷衣拜逸民灘聲猶自動星辰富春近日誰漁父天子當年有故人名到先生才是隱賢如光武不稱臣只因曾

詩話補遺卷一

十

作梅家婿外氏家風愛隱淪

嚴先生爲梅福之姪事見逸史

又明月到樓忘

是夜桃花無水不成春俱有意思不似貴人筆墨

康熙末年布衣能詩者金陵有屈思齊景贛蘇州有李容山

果二人俱落落孤高與朱草衣別一風格容山詩余見甚少屈長于五古工夫勝草衣而性靈不如在僧壁見與馬秋田沈方舟姚玉亭觀秋色云香閣層巒上登臨落照邊鐘聲傳下界人語近諸天紅葉齊爭艷秋花靜可憐蕭然林壑外歸鳥度寒烟莫愁湖云一自美人去至今芳草生詩境冷淡可以想見其人余宰江寧從來一見

天長陳燭門以剛壬辰進士與王孟亭同年論詩兩不相合

以王好險拗而陳平和故也陳長于投贈贈顧俠君云心厭

承明戀釣槎題名江上有籠紗鼓鐘清廟元和筆簫管揚州
大業花重碧千巖傾牝道軟紅十丈憶東華相看淮海詩人
盡攜手平山日又斜

瀋陽唐俊公莫司閔九江四方詩人遊者必有唱和余于詩
話中已詳言其壇坫之盛先生詩尙未見也近始得其歸舟
卽景云逸興忙中減茲遊片刻清岸蟲隨櫓急渾火貼波明
山暗殘陽滅江寒夜氣生莫教驚野浦恐散白鷗盟環翠亭
納涼云古亭雅集趣新涼明月依人照異鄉老樹靜風鴉睡
穩山衙報漏鼓聲忙向平心事誰知已庾亮襟期自笑狂白
雪陽春歌滿座不堪回首少年場讀之想見盛世昇平官領
閒曹之樂其名真保貌如冠玉早入翰林出錫山稽公之

詩話補遺卷一

十一

門人以爲先生禮士尊賢之報也

杜紫綸先生選唐人叩彈集專尙中晚學者從茲入手可免
粗硬槎枒之病而宗法少陵山谷者意頗輕之先生虎邱兩
愛云六宮花老淚臙脂點點殘紅墜晚枝自是東風無著處
本來西子有歸時錦帆冷落青簾舫玉管闌珊白紵詞雙漿
綠波留不住半塘烟柳雨如絲先生翰林前輩與余同試光
明殿恰末一握手

沈歸愚言沈方舟詩藏少戈家小戈已亡求之不得杭堇浦
言方舟詩在福建布政使張廷枚家或少戈卽方伯之宗人
未可知也沈詩音節沉雄得明七子梗槩而新穎過之足迹
所到足以助其豪宕之氣如下朝陽云似聞風雨作前有大

雖來一氣雙江合孤城百粵開
鰲身移鳥岫屋口出樓台倚
棹懷湘子橋成力大哉余每過灘先聞聲響讀此方知其妙
他如小泊云竹喧歸鳥後村靜飼蠶時天啟德陵云內豎一
朝祠宇遍愛書三案士林空懷宗思陵云一劍割將公主愛
九門報道寺人開泰山云四嶽共推青帝長一峯還占丈人
尊皆膾炙人口有長安陶友蘭者愛其詩臨卒命以方舟詩
集置棺中爲殮亦異人哉

虎邱山塘有白傅舊題其碑爲居民埋匿汪松蘿掘得之沈
賦詩云片石苔封闕歲華憑君磨洗認龍地從今竟得春風
路送與吳娘踏落花王吳廬崇伯捐貲贖甲寅難婦百餘口
沈贈云紅淚千行濺鐵衣傾家不惜拔重圍揮金欲笑曹瞞

詩話補遺卷一

十一

客只贖文姬一個歸

雍正間宣城有布衣葛鶴字雲衢者詩筆頗清年未四十而
亡陳古澳誦其佳句云巢傾爭宿鳥鞭響過橋驢夜雨屢遷
孤客館秋風先瘦異鄉人

詩用眼前之典能貼切便佳陳燭門贈李天山云老人吹火
類劉向天子臨軒問長卿楊兼山在戶部歲暮云探簿當年
猶絮罷崔承近日只哦松姚姬傳贈陶生云貧無素業彈長
鋏行人朱門着小冠語俱妙而姚詩似有所諷

詩有無心而相同者陶篁村偶成云閉戶渾如坐佛幢彈琴
作伴影成雙多情只有蕭七竹時帶斜陽綠到牕姚姬傳亦
有涼階一首云涼階今夕又飛螢倚檻風前已涕零人迹不

如修竹影每隨明月慳庭幽題闕江樓云木落天空關暈鳴
明動搖亦奇偉可喜

沈方舟出峽云舟擲波心去人穿石罅來狂瀾至玉屏云人
從激箭流中坐船在崩崖罅裏行

丙子年家子陶時行以胡氏一房山詩集見示作者六七人
壬寅秋余過蕪湖主人激泉淳邀遊其處屋不甚多而窻對
者山門臨湖水洶鳩江一勝景也集中管松厓大史幹珍云
日夕山水碧冷然秋更清微風湖面至初月竹稍生排雁銀
筍柱跳魚玉尺聲不愁歸路晚村火似星明淡霞山明府如
水云玉室菊排三徑秀開窻風送一山秋仲燭亭絕巖秀才
云小閣乍開雙白板秋山剛借一屏風宋等田明府榻藪云

詩話補遺卷一

十三

沙外鷗眠開勝客竹間禽語妙于詩主人曉起云殘月林中
挂晴雲空際生北窻幽夢覺天色欲微明露罷蕉花重烟凝
竹葉清迎風傾兩耳恰好一蟬鳴

出入權貴人家能履朱門如蓬戶則炎涼之意自無所動于
中宋人咏松云白雲功成謝龍去歸來自挂千年松汪易堂
菴霖咏菊云不蒙春風榮詎畏秋氣肅可謂見道之言汗又
有白桃花云稷盡錯華露一叢輕陰漠漠淡烟籠漁郎錯認
仙源路洞口春深雪未融七夕呈冰玉主人云神光變轉有
無中靈駕雲衢一水通欲乞天孫爲補拙明朝移巧到城東
皆言外有意

二山徐水鄉名志不事舉業專攻詩年三十三而卒卒前十

日病臥牀語其父云兒往謁洞庭陰君矣惟一生心血在詩
可以遺稿付吾友浦翔春藏之其時浦猶未知其死也夢與
水鄉談甚樂自言已死四日矣今遊趙秋谷先生門下講詩
工夫大進一笑而去浦爲刻其詩號百刪小草海上秋風云
魚鱗千戶縣初成高築回塘似帶橫天任孤城淪碧海帝爭
尺土與蒼生扶桑日射旸橋出碣石雲開島嶼明極目滔滔
烟水瀾秋風無浪總堪驚弔韓蘄王云宋家猶有西湖在且
自騎驢遺暮年此夕云明知惜玉須完璞無那看花想折枝
皆有性靈

孔北海云人之後生喜誇前輩水鄉唼鸚鵡刺之云怪儂巧
弄無多舌才解人言便罵人又刺元稹云君臣兒女情無二

詩話補遺卷一

十四

報國會無薄行流

水鄉有友呂步瀛字仙客亦工詩而早亡贈馮雲九云名士
門生羽士師仙擅步王少年時男兒只道封侯易誤到頭顱
白未知馮棄儒入道故呂羨之亡何二人俱亡

余嘗謂陸放翁康對山俱一入權門名爲小損然士大夫寧
爲權門之草木勿爲權門之鷹犬何也草木不過供其賞玩
可以免禍恰無害于人爲其鷹犬則有害于人而已亦終難
免禍東坡咏馬季長云不礙依梁冀何須害李公騮是落第
二層身分而言之亦可悲也

王蘭泉方伯詩多清微平遠之音擬古樂府及初唐人體最
擅長自隨阿將軍征金川在路間寄南斗集一册讀之俶詭

奇險天得江山之助方信古人云讀萬卷書行萬里路缺一
不可也過甕亭洞一首云急溜從東來銳石忽西拒水爲石
所搏奔流竟回注豈知限波咆欲走不得去回旋跳浪花蓄
勢仆馳鷲荷爲一葉舟竟往殺其怒舟水相撞春進退屢猶
豫乘間突而前奇絕詫徑度大石如覆舟小石如斷日其色
伴豬肝其狀肖熊首其積異重巖其裂豁破舌譎詭非一形
爭出扼溪口三石更頽然似結烟霞友臨空出窟穴大小靡
不有伸受篙師篙真宰信非偶昇輿短歌云下山走坂丸上
山逆水船下用四人夾上用四人牽長繩繫板當胸穿鼻者
二耦趨而前二十四足相後先如魚逐隊蟻附牆如羊倒挂
禽齋審我身托輿輿托肩肩上尺木絙以緣莫怪僂僂走不

詩話補遺卷一

七

前脚底千峯方刺天

人問懼內之說始自何時余戲云始于專諸越絕書稱專諸
與人鬪有萬夫莫當之氣聞妻一呼卽還豈非懼內之濫觴
乎五代時朱溫雖凶暴亦有專諸之風其他文學之士如王
謝兩公張稷李陽諸典故固無論矣人又問懼內可見于詩
歌否余只記唐中宗寵暱后優人因裝談與宴知君臣同病
唱回波詞曰回波爾似栲栳怕婦也是大好外邊只有裝談
內裏無如李老后喜以東帛賜之

哥字最俗不入詩文惟唐時張元一主司郎中咏靜樂縣公
主云馬帶桃花錦裙拖綠草羅定知幃帽底儀容似大哥其
時武懿宗短醜而其妹甚長人呼妹爲大哥公主與則天並

行則天命元一嘲之故云爾也此外白香山詩有向似沙哥
領崔嫂碧油幃引向東川沙哥者楊汝土小名居易則楊之
妹婿也元世祖袖其臣董文炳爲董大哥亦奇

儀真白大年有漁父詞云櫂頭暝子送生涯來往茗溪與茗
耶手把一竿春又老釣絲牽上野桃花浦翔春漁父詞云水
之涯山之麓蓼花行蘆花宿不脫蓑衣酣睡足得魚換酒笑
向天月落空江自歌曲二詩俱妙石又有句云手劈芭蕉充
繭紙眼看蜘蛛學蠹書

路途行役之詩明將軍瑞有句云沿途聽爆竹逐驛讀春聯
邵元直孝廉有句云行旌最喜晴畏熱轉思雨皆行路之實
情實景也邵又有句云馬蹄易礙非芳草鴉背難留是夕陽

詩話補遺卷一

共一

浮生若寄誰非夢到處能安卽見家刺憐車馬馳驅苦幸喜
山川應接忙皆妙又車前細雨織成簾七字亦頗是路中雨
景

楊升菴曰詩至杜而極盛然詩教之衰自杜始理學至程朱
而極明然理學之暗自程朱始非杜與程朱之過也是尊杜
與程朱者之過也客座賢語曰李于鱗詩律細而調高然似
吳中暴富兒局而止是華美精緻若杜少陵便如累世老財
王家中百物具足卽偶然陳朽間錯愈見其爲富有也兩段
議論甚佳故錄之

余丁巳流落長安館高怡園先生家三月後四十餘年先生
亡矣余感其德爲撰墓志以報不料又隔數年張蒙泉果寄

夢中緣一冊來云先生亡時貧甚家有九棺未葬夜見夢于童蒼二樹以箋紙索書梅十幅童素不相識驚醒則案上有余所作墓誌存焉所謂短而癯者卽其貌也以告蒙泉蒙泉曰得毋高公欲假君書以歸土耶蓋其時二人同客中州而童書甚貴重故也童欣然握筆及畫成買者無人適河南施我真太守來見之嘆曰畫梅助莖真盛德事乃取其畫而助莖資二百金題詩曰十幅梅花十萬錢詩中之伯畫中仙耶

涇太守相清俸了却幽人夢裡緣張招同人和其詩號夢中

緣云高公名景漢官至觀察

余親家徐題客畫穿雲沽酒圖余題云玉貌仙人衣帶斜腰間瓶插綠梅花穿雲何事頻來往天上嫌無賣酒家後讀王

詩話補遺卷一

十一

荆公集有句云花前若遇餘杭姥爲道仙人憶酒家與余意似不謀而合

某大史詩集四十餘卷余與交好欲采教言人詩話苦其太多屢門下士周午塘代勘之周戲題見覆云何苦老詞增篇別調彈披沙三萬斛檢得寸金難余不覺大笑戲和二消夏間無事將人詩卷看選詩如選色純覺動心難

黃煊號補山泰州別駕也有昏夜獻金者題其函云感君厚意還君贈不畏人知畏亡知余傲其意題鏡云從無好醜向人說只等君看自己知

涇縣趙星閣先生奇黎乾隆元年春闈第一人也後官侍御以其薨去官爲人古淡朴質有詩集高尺許記其視某云退

食常隨鶴閒行不杖鳩夜行云高樹引涼生腋下遠山銜月
挂輿前又阻風云客舟牢繫客心飛七字尤妙

余買小倉山麋園舊爲康熙間織造隋公之園故仍其姓名
隋爲隨取隨之時義大矣哉之意居四十餘年矣忽于小市
上購得前朝顧尙書東橋先生手書詩幅題云茂慈詞丈就
北山之麓構園名隨園索余賦詩因贈云霜松雪竹憶歸初
千載猶堪借客居雨過泉聲飛卷幔雲生嵐翠擁行裾金尊
座對賢人酒石室山藏太史書共說高情邱壑在蒼生凝望
意何如又曰誰向山居同採咏主人原是謝公才讀其詩想
見主人亦是詞館文學之士而歸隱者北山之麓常卽在小
倉山左右末署天啟五年友弟顧起元書事隔二百年而園

詩話補遺卷一

天一

名與余先後相同事亦奇矣惜茂慈二字是字非名終不知

其爲誰也

後考邑志茂慈名潤生係
羽侯之長子守志南殉節

余丙辰年過廣西全州見江上山凹有匣非石非木頗類棺
狀甲辰再過觀之其匣如故絲毫無損相傳武侯藏兵書處
或用千里鏡觀之的係是木匣非石也但其上似無蓋耳庚
戌夏間偶閱朱國禎湧幢小品云嘉靖時上遣南昌姜御史
訪求奇書入全州張雲梯募健卒探取乃一棺中函頭顯甚
巨兩牙長尺許垂口外如虎豹狀卒取其骨下山卒暴死姜
埋其骨而覆奏焉余曾戲題石壁云萬疊驚濤百尺崖山凹
石匣有誰開此中畢竟藏何物枉費行人萬古猜爾時未見
湧幢所載故用疑猜若見此書亦無可猜矣惜武夷山之紅

橋板不得姜御史搭雲梯而一探之

康熙辛亥趙斗瞻從晉入都道經定州清風店宿逆旅主人
家姓陳號繼鳴壁上有絕句一首云馬足飛塵到鬢邊傷心
羞整舊花鈿回頭難憶官中事衰柳空垂起暮煙後跋云妾
廣陵人也從事西宮曾不一年被虜旗下出守秦中馬上琵琶
逐塵而云逆旅過此語不成章非敢言文惟幸我梓里同
人見之知妾浮萍之所歸耳時庚寅秋杪也廣陵葉眉娘題
桐城張映沙若瀛個儻負氣作熱河巡檢鑾輿駕臨有太
監某橫索金帛其勢洶洶知縣遁矣張以理論之太監大罵
張命役擒下重杖二十總督方公大驚以爲顛據實奏
上嘉其官卑而能執法將太監登時充發而擢張爲河北同

詩話補遺卷一

十九

知余按唐敬宗五坊小兒騷擾百姓長安令崔發遣人拘之
尙未訊也中官率百餘人持棒直入殿崔幾斃敬宗猶怒其
擅拘中人下崔於獄以今較昔聖主之聖庸主之庸豈不
相懸萬萬哉映沙特聖明在上得行其志在北路時有上
公莊頭強贖民田戴花翎來說情者數輩映沙盡行揮去拘
強贖者杖之衆爲讙伏映沙雖剛正而喜恢諧桐城土俗呼
叔叔爲椒椒其時族弟曾做編修鄉試分房有叔某爲大興
縣丞遵例迎送榜後門生有獻狐裘二襲者映沙賦詩嘲之
云恩旨分房第一遭馬前迎送有椒椒鹿鳴宴罷懷銀器
虎榜人來捏紙包白髮門生雙膝屈藍瓘文字七篇高莫言
分校無他樂失婦同時着大毛

人有以詩重者亦有詩以人重者古李杜韓蘇俱以詩名千古然李杜無功業不得不以詩傳韓蘇有功業雖無詩其人亦傳也而況其有詩乎金陵方伯康茂園先生清風惠政人所共知在睢寧治河落水中神扶以起余記其事載文集中公豈藉詩以傳者哉然重其人則其詩亦因人而重今春三月詩弟子陳熙爲抄一册見寄錄其繁峙學署有懷云吾懷仲夫子負米欣然歸吾愛楚老萊踟躕舞班衣人生離膝下忽忽欲何之憶我少年時并里從兒嬉甫壯營薄祿出門意遲遲一官爲親喜山城復羈縻官冷飯不足嗟哉無算遺感此傷客心晨昏忍暫違寒風生四壁瑟瑟砭人肌以我念母日知母憶兒時憶兒憐其少憶母慮其衰人生願爲兒結念

詩話補遺卷一

三

常在茲登焦山云浮玉菴天碧迴瀾障海門人從初地入峯到上方尊吳楚當軒合雲山遠水吞我尋高士宅三詔石猶存此兩首一徵仁孝之思一存清妙之旨讀者如食終山桃雖不得仙亦足以豪矣公諱某田丁丑科進士山西與縣人鰲滄來明府有妹名潔爲紫庭太史之女性愛吟詩年十六適西品宗室魁明年二十而寡守志撫孤常寄滄來云織盡人問寡女絲三更涕淚一燈知近來焚却從前稿不爲懷兒不作詩兒女乾啼濕哭餘偷閒才得寄家書望兒好繼襄勤業莫使官聲竟不如滄來襄勤公成龍之曾孫也歷宰吳下清慎勤敏綽有祖風

俗稱女子不宜爲詩陋哉言乎聖人以閑睢葛覃卷耳冠三

百篇之首皆女子之詩第恐鍼滯之餘不暇弄筆墨而又無人唱和而表章之則淹沒而不宣者多矣家龍文弟婦黃氏雅宜香亭簪室吳氏香宜俱有窈窕之容全居一室互相切磋黃咏燈花云銀釭奪月吐光華影入窓櫺透碧沙未忍輕挑私問汝不知何喜報吾家吳咏梅云爲受春花放遲遊人偏採未開時儂心恰愛天然好不恐臨風折一枝春晴云細雨連宵濕軟塵今朝晴放一窓春柳絲低舞花添笑卻似風前得意人皆清妙可誦又有淑端內史者見二人詩而愛之贈一絕云誦君佳句愛君才未對菱花卷已閒想是瑤池曾結伴詩仙逃下一雙來余按荀奉倩云女子以色爲主而才次之李笠翁則云有色無才斷乎不可有句云蓬心不稱

詩話補遺卷一

三

如花貌金屋難藏沒字碑

龍文侯補粵西家無擔石而家信來詭云娶妾雅宜答以詩云即君新得意志氣人雲驕未置黃金屋先謀貯阿嬌蓋揶揄之也香宜知余采其詩入詩話以詩謝云有志紅窓學咏詩絳帷深幸侍良師微名也許登詩話榮似見夫及第時戲香亭也雅宜名楨香宜名蕙淑端姓誼名楮

梁山舟侍講南山掃墓見方姓人家張壁一幀乃康熙二十六年丁卯科題名錄一紙卽市賣之物完好如故且刻板精潔比近日百信正榜僅五十名副榜十名同考十二房井主司官爵表字鄉貫一一詳載于尺幅又監臨提調三場題日皆全解元於潛伍涵芬第七名卽查聲山先生也榜姓卽百

餘年故紙居然不毀亦一奇也梁中乾隆丁卯舉人是科有重頂鹿鳴之周名天相者因題其後云我年二十五卯歲領鄉薦再上六十年此榜寔羔鴈憶余鄉試時群集隨諸彥領袖鶴髮翁謂中錢第四十二名周翁天相錢塘人巍然靈光殿風貌既甚古章服亦不賤私竊問姓名愛蓮分一瓣少年曾筮仕秋視諸侯半歸卧田里間後生茂由見茶逢盛典舉重預嘉賓宴今後卅年餘翁久隨物變卽余同年生八九已露電乃于山人廬忽覩紙半片上鐫于佛名一佛曾識面當年取士巖額解纜大衍主司及同考一一載可實字迹頗工整首尾無漫漶想見誇賣時狼籍坊市遍此紙逾百年獨再優曇現賢哉方山子拾得常自玩藏弄比一箋裝背作畫卷某也後進入彰

詩話補遺卷一

三十一

美在所先率書五字詩留下一重案余道此與康熙年間吳鱗潭祭酒在 聖祠 得元人題名三碑一蒙古一色日一漢人皆有正副余買得紹興十八年朱子題名碑相倣

福建高南疇觀察官江南時與余交好遭患難後三十年不通音問庚戌秋其存竹筒和詩相訪壽陽云陟險攀藤上峒巖勢百尋路危遲馬步峯峻怯人心殘夢扶鞍續愁懷對月深前程卻莫辨雲霧濕衣襟青玉峽云人隨飛鳥渡僧帶斷雲來平山堂云紫蝶緩隨人影去綠楊低護畫船行皆佳句也嗚呼余見公子時年六七方疑流落何所而竟能清詞麗句卓然成家可謂佳公子矣

吾鄉金江聲觀察有句云蕭寺秋聲流夕磬酒樓紅影上春燈陽湖楊字昭有句云滿林黃葉通樵徑繞郭紅燈半酒家

詩話補遺卷二

余丙辰入都胡稚威引見徐壇長先生己丑翰林年登大臺少遊安溪李文貞公之門所學一以安溪爲歸詩不求工而間有性靈流露處贈何義門云通籍不求仕作文能滿家坐環耽酒客門擁賣書車真義門實錄也幽情云酒伴強人先自醉棋兵捨己只貪贏安居云入坐牛爲求字客敲門都是送花人亦圭美集中出色之句

溧陽彭賈園先生素無一面寄雲溪詩集見示有筆有書亦唐亦宋不愧作者佳句如雨咀淮上云春氣勒堤柳水光壓野烟舟中云長河欹枕過片月貼帆飛劍津云早知神物終當化何似豐城便永埋無題云月展壁輪宜喚姊風吹池水最千卿皆妙又接家書云有客來故鄉貽我鄉里札心怪書

來遲反覆看年月只此二十字寫盡家書遲接之苦先生名
光斗出仕間中

某有句云落月鋪滿地秋聲尋到門余愛其中一尋字因憶
厲太鴻有明月出樹如相尋七字亦復相同

武陵胡少霞鵲老於蓮幕死後雲南彭竹林明府鐫其萬吹

樓遺稿付余曰此少霞一生心血先生爲存其人可乎余錄

其渡口五絕云渡口秋來樹迎風葉葉黃懷人相望久猶道

是斜陽和史梧岡云蓬萊回首隔山河王子吹笙帝子歌聞

說長春在天上春愁應比世間蘇州汪山稚明府獻聖

祖南巡詩蒙召入南書房一日聖祖坐內廷取榻上冊顧

諸臣曰卿等試看此冊是何人筆墨皆奏曰似翰林陳邦彥

詩話補遺卷二

上笑曰非也此是邦彥內弟汪俊所書詩字俱佳其受知

如此旋出宰醴泉以詩酒罷官余在薛生白家與同宴集來

往甚歡欲覓其遺稿竟不可得近見少霞有懷汪一絕云幾

年著作直承明萬壽詩章御榻橫曾說九重親賞識是何

年少有韓翃

宜與儲玉函太守同年梅夫之從子也詩筆與其弟玉棊相

似而尤長於五言過舅氏別業云乞壘權遊地重來舊業存

敲水進孤艇曝日聚開棚影深藏屋漏光冷逼村廿年人事

改昔夢向誰論佳句如竹陰清石磴花色淡秋衣遠鐘清過

水深竹暮連山又春烟浮綠野夜火滿卅陽對仗亦巧

桐城李仙芝自稱抱犢山人館方氏三梅齋夜半開門宿鳥

驚噪因得推牕驚鳥夢五字以爲似賈浪仙然終未成篇也
又隔五年爲山館蟲聲振觸方足成一律云宵深寒氣重山
館劇淒清夜月猿僵臥秋螢鬼擁行推窗驚鳥夢就枕聽蟲
聲寂寂孤燈燼匡床已二更又客金陵見新燕有感云尋巢
擇室幾經春故國鳥衣夢想頻上苑喬林遷不到生成薄命
是依人其寓意亦可悲矣

對聯之佳者趙雲松見贈云野王之地有二老北斗以南止
一人龍雨蒼見贈云羲皇以上懷陶令山水之間樂醉翁余
自題云讀書已過五千卷此墨足支三十年黃浩浩嘯江有
句云花怯曉寒思就日柳搖春夢欲依人胡蛟齡蔚有句云
前山暖日如修好昨夜狂風尙費餘俱新

一詩話補遺卷二

三

諸襄七檢討性情迂傲有弟子求題圖先生開卷見齊次風
侍郎周蘭坡學士先題矣心有所收大書曰齊大非吾偶周
衰尙有髭兩人都已寫何必我題詩

凡藥之登上品者其味必不苛人參枸杞是也凡詩之稱絕
調者其詞必不拗國風盛唐是也大抵物以柔爲貴綾絹柔
則絲細熟金鐵柔則質精良詩文之道何獨不然余有句云
良藥味不苦聖人言不腐

常州呂映薇秀才邀人作簾鉤詩首唱云槩戟深深鉤影微
玉竿竿上綺窗衣呢喃燕語窺巢入溶漾絲牽入戶飛十里
鈿鏡攀絡索一聽燈燭落珠璣巖公幕下憐才甚三挂冠中
是也非吳穀人太史云縱殊畫向鴉義展宛似書臺蠹尾成

秦端崖太史云遊空半學魚抽乙倒挂真疑鳳是公吳古然
云眼于檻外看么鳳手出棧頭見美人又穀人云分明賭酒
曾攏袖仔細擽頭輪碾冠皆可謂工矣

乾隆庚戌五月二十六日直隸完縣有一產四男者大吏奏
聞秦西岩觀察賦詩云一胎不數三丁異八士何難兩乳成
丙戌方比部均堂昂見訪隨園留詩一冊而去其感懷云
衣蕩笠愧坡仙放浪慵營洛下田過眼功名花在鏡驚心歲
月箭雄絃鬚毛短處人應笑髀肉生時我自憐多謝長征識
途馬也如名將歷幽燕通首氣格雄渾與高東并交好贈云
貧多遊覽懷應壯少不窮愁句自工

真州張湖字愚谷咏落葉云會爲上古衣裳用莫道關珊是

詩話補遺卷二

四

棄材此意古人未道

雲南離中國七千餘里而近日文章之士甚多以彭氏一門
爲最香山合彭少鵬名者著在肇慶受業于余曾載其佳句
入詩話矣今秋以獲海盜保薦入都過金陵宿山中三日購
書一船而行其人弱不勝衣而擒盜入洋乃有餘勇余爲驚
喜贈七古一章載入集中彭獅子洋云到此疑無岸飄然天
際行珠光隨月滿水氣與雲平猛虎原名鎮蓮花別有城一
聲秋夜笛吹動故鄉情澳門云天上風雲全護水海中村落
總依山他如涛聲歸壑急海艇攔沙多無雲天水台有月海
山清舟行未雨前日落無人處皆奇境也見訪云升堂由也
果今日到隨園用論語甚趣其族人彭印古亦有句云雲深

都失路葉落不藏村竹裏敲詩隨鶴步花間鼓瑟與魚聽窗
橫野色雲千里松帶濤聲水一樓俱妙

少鵬全舟有蘇君名櫬者亦詩人也昆明旅次云山光臨坐
暗湖氣入門涼冬夕云舉步霜月中人寒影亦濕又有昆明
翰林錢君名澧者留宿李氏小飲云二麥將枯老却春南郊
徧訪萬天民九年不其尊前飲再宿猶疑夢裏身門接山光
來異縣墻分花氣與芳隣蓬瀛故事休夸說看取風前兩鬢
新趙州龔簪岩名錫瑞者工古樂府及七言長句龍尾關前
水年年帶雪流如聞天寶卒永恨國忠謀蜀道倉皇幸冰山
頃刻休餘兵二十萬白骨竟誰收自註云唐時高仙芝攻大
食國安祿山討奚契丹楊思勗討叛蠻各喪師數萬故及之

正訂話補遺卷二

五

又遊飛來寺云孤月晴翻江影動亂松寒送雨聲來悼亡云
鬼燈如見通宵績故袂猶疑帶病炊泪下憐余如隔世挂遺
驚汝尙持家贈某云從戎二十執戈受百戰餘生胆氣粗飲
馬長江休照影恐驚霜雪上頭顱

周中翰青原娶沈氏爲蓮花所沈司馬之長女常來隨園看
花貌明秀而性和婉不愧名家女不知其能詩也歿後其子
之桂從故簾中檢得其思歸云東風吹恨幾時消春水連天
又長潮自嘆不如梁上燕一年一度也歸巢初晴云晚霞紅
映碧窗開雁字搖空入鏡臺漸遠不知何處去化爲雲氣過

山來

每過池上見楊柳向人低折遊山見紅牆必是僧寺皆眼前

事也真州李秀才濂有句云往來恰怪沿隄柳低舞成行欲拜人又曰約畧招提前面是淡金塔影淺紅墻

錢辛楣少詹序馮曉廬之詩曰古之君子以詩名者大都自抒所得而非有意于求名故一篇一句傳誦于士大夫之日後人會萃成書而集始名焉南齊張融白題其集有玉海金波之名五代和凝鑄集行世人多笑之近世士人未窺六甲便製五言又多求名公爲之標榜遂梓集送人宜于詩學入之不深而可傳者少

曉廬者姓馮名懷邨躬耕于太倉之璜徑歿後其詩始出冊中書所見云進鮮河裏布帆飛秋水清漣鱸鱖肥掠髻渙娃都帶濕太湖風雨打魚歸五言云遠水籠烟濶遙天壓樹低

詩話補遺卷二

六一

饑年憎閏月病叟厭餘生嬾僧遲見客冷寺早鳴蟲題韓文公集云一檝投溪旋徙窟聽言猶覺鱗魚賢托諷冷雋又客與寒潮共到門七字亦佳

太倉又有許培秀者題畫云垂柳罨晴烟微風颺飛絮一帶綠陰濃鶯啼不知處末二句是聞鶯真境界非身歷者不知又望月云但覺溪光白不知新月生得友人信云曉起聞啼鳥書來正落花

七夕詩最多家四妹棠云匆匆下顧塵寰處如此夫妻有幾家近見休寧陳蕙畹湘有句云天孫莫向嫌權短儂自離家已五年俱有情致陳又有句云蛛網蒙飛絮蜂鬚挂落紅隔岸炊烟起紫瀨牧笛歸楊花云無賴喜遮遊客面多情時人

酒人家

蕪湖有鍾姓女子名睿姑字文貞能詩能畫能奕兼工時文
受業于寧孝廉楷陪其師遊冶父山云笋輿重去訪名山楓
葉才紅綠未斑自把瑤棹傍溪樹乘風一奏白雲間無梁殿
冷石門秋鏤劍池空水不流苔蘚照人心自古滿天晴雪落
峯頭樹裏湖光一鏡開水精宮外有樓臺散花不到維摩室
親捧雲珠共佛來寧故宿學之士余宰江寧時與秦大士朱
本楫諸公受業門下五十年來群賢亡盡而寧年八十巍然
獨存又得女弟子以衍河汾一脉亦哀年聞之而心喜者也
海鹽崔應榴秋谷吳江夜泊云小驛秣初起孤蓬月已上漸
息人語喧微聞水聲響真州客夜云凍雨欲歇聲漸微窺窗
殘月揚清輝此時有酒不成醉明日無風那得歸江水翻翻
自北上秋鴻一一皆南飛矢歌未闕雜報曉滿庭白露沾我
衣

詩話補遺卷二

七一

壬寅春余遊黃山路過貴池昭明太子廟有新撰碑文甚佳
末署名者爲邑宰林夢鯉其文古雅似出六朝高手乃揚其
文以歸徧問何人秉筆絕無知者庚戌夏間在蘇州門生顧
立方敏恒作府學廣文來見出示古文四篇其首篇卽昭明
太子碑余不覺狂喜自夸老眼之非花

尹文端公病重時有人以秋雨殘荷圖求題公題云秋雨滿
池塘殘荷委流水可憐君子花衰來亦如此題畢嗚唏再三
未五日而卒公諸子皆能詩四公子樹齋以蔭得官有句云

三代簪纓承雨露一家機杼織文章三公于雨峯以科名起家咏獨秀峯云十丈芙蓉拔空起爲山原不藉邱陵文端公見而笑曰三兒以我爲邱陵乎

徐上舍濤吳江人號江菴少倜儻不羈長子近體贈龍雨樵明府云客來風簾尋琴譜人到公庭乞法書龍頗重之又題清霧瑤臺云石闌屈曲路橫斜流水空山見落花貪逐胎仙過橋去不知涼露滿輕紗病中與郭頰伽秀才鄧尉探梅云今朝尋花將命乞呼童荷鋪隨我行死便埋我梅花下君爲立石題我名後之遊者攷歲年手摸其文笑且顛咄哉此子本多病不死爨下死花前果以是年不起

謝康樂詩千岩盛阻積萬壑勢縈回李白詩千岩泉酒落萬

詩話補遺卷二

八

壑樹縈回二句不但襲其意兼襲其詞以太白之才豈肯蹈襲前人因其生平最喜謝詩故不覺習而不察杜少陵平生最愛庾子山故詩亦往往襲其調如風塵三尺劍社稷一戎衣之類不一而足

余每出門或遠行數千里之外撒手便行無繫戀之意及在客邊住久到歸家時賓朋相送反覺難堪輿化任進士大椿有句云放船歸思減久客別人難

新安王勳字於聖精于醫理意准樹觀察因其長子病重延之診視夫人吳氏順便請其按脉王曰長郎胎毒無妨也夫人脉已空矣明年三月恐不能過時夫人方強健閱文嘗以爲詛咒群笑而罵之旬期竟如其言余患腹疾訪之揭合岐

其以師禮相事科藥量水有劉真長之風出乃父槐亭森詩
見示錄其新年到家云水陸因由臘及春到家重慶履端辰
漫談別後風霜苦且放尊前歲月新昨日尙爲羈旅客今宵
才屬自由身梅花不是因寒勤有意含香待主人遣興云野
花村酒堪娛性山月溪風亦解懷莫使寒梅和露菊年年含
怨望青鞋二詩頗見性情他作未能稱是初於聖之意欲梓
乃父全稿余止之曰槐亭集并不清妥但無甚出色處雖付
東梨無人耐看不如提取佳者入詩話中使人讀而慕思轉
可不朽

廬江胡夢湘孝廉沈本陸秀才之甥也名光燦早歲能吟歸
雁云雲淡影相失月名聲更稀秋夜云雁來月夜閑河冷秋

一詩話補遺卷二

九一

到江城枕簟知懷人云繞徑蟬聲人迹少一庭烟散月明多
可謂何無忌酷似其舅

顏古翁詩對仗最工有不可磨滅者如天哀孝婦三年阜山

畏愚公一夕移門羅將相文中子例變春秋太史公之類

吾鄉鮑以文廷博博學多聞廣鐫書籍名動九重不知其

能詩也余偶見其夕陽二十首清妙可喜錄其一云一區人

間夕又朝晚來依舊滿開寮疎分霜葉秋容淡細點征帆別

思遙淡淡欲隨城角盡明明還帶酒旗搖迷藏慣墜西樓影

不似春愁不肯消其他佳句如馬上看山多倦客溪邊掃葉

有閒僧問誰開袖遮西手老我空懷再少心遠引鐘來雲外

寺漸分燈上酒家樓願得少留躑一角悔教高卧竹三竿不

愁一去縱難覓却恐重來事轉生山外有山看未足幾回倚杖立衡門皆妙絕也可稱古有鮑孤雁今有鮑夕陽矣

異域方言采之入詩足補輿地志之缺古人如鮑暉躍清池悞我一生路裏采之類不一而足近見梁孝廉處素履繩題

汪亦滄日本國神海編云貢院繁華繫客情朝朝應辦幾番更筵前只愛紅裙醉拽盞何緣號撒羨貢院者館唐人處也

佐酒者號撒美蠟油拭髻臙髮妾住花街任往還那管吳兒心木石我邦却有換心山妓所居處山名換心山十幅輕

綃不用勾倩圍夜玉短屏幽通宵枕麻姑刺好向床前聽聞半其俗以木爲枕號麻姑刺直豎而不貼耳故至老不聾

李寧圃太守潮州竹枝云銷魂種子阿儂佳開襪千金莫浪

一話話補遺卷一

十一

夸高捲篷窗陳午宴爭夸老衍貌如花六篷船幼女呼阿儂佳梳籠謂之開襪幼女梳籠以得美少年爲貴不計財帛呼

婿曰老衍

李公竹枝亦有都知錄事之不可不記者以其人皆有可取故也其一云金盡床頭眼尙青天涯斷梗寄浮萍紅顏俠骨

今誰是好把黃金鑄阿星暮客某流落潮陽魏阿星時邀至舟中供給備至五年不衰病愈復資之赴省又十年攜重貲

復遊於潮時星已色衰載客他往某居潮半載俟星歸酬以十金爲脫蠶籍其二云艷說今金品絕倫阿珠含笑復含嚔

道儂也有冰霜志要待蓬萊第二人金姑卽狀元嫂卓識堅操人所不及阿珠笑曰妾貌雖遜金姑而志頗向之惜未遇

榜眼探花耳其三云日向船頭祝逆風青溪三宿藥爐空星
輶不許騎雙鳳却悔腰間綬帶紅某舉使惑于大鳳小鳳自
廟至青溪六百里緩其程至十餘日抵岸又托病在船三宿
而後去二鳳亦爲之卧病經年其四云除却蕭郎盡路人寶
兒憨態最情真新詩便是三生約爛爛胸前月一輪湖州某
與寶娘交好特爲鑄鏡一枚鐫其定情詩于背寶娘日夜佩
之

呂紹堂客分宜見嚴氏家譜載世蕃有兄名世藍者家居不
仕陸隣敦族後不罹于禍今之子孫皆其苗裔也梁孝廉述
而弔之云兄豈難爲非競爽子能不肖始稱賢

考据之學本朝最盛然能兼詞章者西河竹垞二人之外無

詩話補遺卷二

餘子也近日處素諫菴兩昆弟頗能兼之處素將至長沙遇
順風云江天如拭晚成晴帆飽舟輕浪不驚斜日漸從鴉背
落殘霞猶映樹邊明飯丸鳥接神應助沙紫風回草有聲頻
向篙工問前路烟中指點武安城其他五言如怪松連石長
歸鳥雜雲飛屋低疑在岸月近總隨船談深蠹語續人靜鼠
聲來浪花入船宿添我硯池水七言如星光墮水白于月樹
色粘雲暗似山荒寺鳴鐘驚鷺起孤村喚渡少人鷹皆妙
泰州宮霜橋善畫能詩余在李明府屏上見其秋夜寄友云
新涼如水撲簾勾唧唧蟲聲動旅愁人到饑寒才作客樹無
風雨不成秋靜聽枯杵催長夜誤煞閑河說壯遊正是相思
無着處一聲征雁下西樓又新柳云青未能榮花雨鳥綠將

扶出酒家帘

亡酉二月十一日余平晝無事翻閱近人詩集正看青陽沈
正侯詩末三頁闕者來報正侯與僧亦輩到矣余爲驚喜信
文章之真有神也沈呈新作余愛其貴也道中云雲遮山入
夢風急鳥移家貪睡每教兒應客好吟且聽婦持家登攝山
云誰云攝山高我道不如客我立最高峯比山高一尺聽渠
云花含簾外笑烏歇樹頭音不判別來七年詩之進境如此
戊申冬余訪明竹岩新于武佑場盤桓三日極唱酬之樂追
思二十年前其尊人作江寧方伯彼此置酒看花忽忽如夢
惜其弟鍊崖亮中年徂謝余將作哀詞以輓之惜無事實故
匆匆尙未暇也錄其青冢驛夜行云空山夜靜悄無聲皓月

一詩話補遺卷二

十一

霜天分外青習慣渾忘身萬里途長不覺漏三更寒星天際

時時換

道中竟日所積雪懸崖處明歷盡高寒情到管人

生幾不隴西行竹岩尤長于言情寄內云料得深閨應有夢

計程先我到遼西細字含情臨洛浦新詩掩卷愛周南俱秀

雅可誦

湖州姜秀才宸熙號笠堂浮萍詩云春水方三月楊花又一

生晚眺詩云晚州都在樹春雨不離山歲暮詩云睡重知春

近人忙覺歲殘贛州太守張公爲余誦之

扶桑影裏看金輪宋文丞相詩也如臯范秀才昂千賦得此

句云極目萬山猶拱宋蹉跎一霎恐移陰頗寫得出忠臣心

事

蘇州桃花塢有女子姓金名兒字湘芷者諸生金鳳翔女也
年甫十三有人錄其秋日雜興云無事柴門識靜機初晴樹
上挂簑衣花間小燕隨風去也向雲霄漸學飛秋來只有睡
工夫水檻風涼近石湖却笑溪邊老漁父垂竿終日一魚無
婺源洪丹采朝陽咏長干塔云渾疑天柱從空降欲信雲梯
可上行二句殊雄偉倪司馬春岩咏裏湖云毀橋合是見家
住湖水當門作鏡奩二句殊清麗

揚州諸生張本字友堂爲山長趙雲松所賞張贈山長云可
能當得逢人說從此專爲悅已容蘇州詩人方大章因劉霞
裳而來受業贈霞裳云扶持玉局尋花仗接引龍華會上人
上海曹錫辰眉亭畫洛曹贈眉以詩云汝能速反乎吾將報

一詩話補遺卷二

七

汝以揚仲卓陸誓不與汝以鬻蹙低攢汝來否乎吾將遲汝
于天台雁宕之間

詩能入人心脾便是佳詩不必名家老手也金陵弟子岳樹
德滋園初學爲詩銅陵夜泊云櫓聲乍住月初明散步江臯
宿雁驚忽聽隣舟故鄉語縱非相識也關情古寺云寺荒僧
去鐘猶在碑老苔生字半存小艇云滿載誰知都是月輕飛
始信不閑處其弟樹仁字樂山亦能詩題隨園云依山偶盍
看花樓樓上看花五十秋到此任爲門外客匆匆行過也回
頭曉步云黃鸝啼破綠楊烟喚醒東風二月天宿露欲晞雲
氣散新山色到人前日日循途自往還胸中繪得好溪山
今朝貪看沿堤柳走過平橋錯轉轡春闌云吟罷伊誰共唱

酬金爐香燼漏聲初侍兒俯仰偷眠態似向燈旁暗點頭
白下余秀才曼吟詩肯刻意不入平庸一路余道從此加功
便能加人一等從揚云得月又愁多受露迎風還恨不當花
洗視云願將賸得涓涓滴酒徧人間沒字碑咏風云欲吹山
作地能送海升天種花云垂頭不語還遮面新種花如新嫁
娘

吾鄉倪春岩司馬廷謨有吏才兩宰桐城謳歌載道詩亦清
新拔俗尹文端公督兩江時最爲賞識尹公晚年好平章着
饌之事封篆餘閒命余遍嘗諸當事羨蕩開單密薦余因得
終日醉飽頗有所稱引惟干春岩治具之口擔肩不薦蓋春
岩但知靡費金錢而平素不曾訓廸庖人故也春岩知之作

詩話補遺卷二

十四

書與余末署菜榜劉蕡四字余爲大笑今年來金陵讀隨園
詩話喟曰何獨無我豈詩榜亦作劉蕡乎余因索其從前呈
獻尹公之詩云都已遺失爲抄近在數首見寄余讀之嘆曰
此護世城中美饌也加人一等矣辛丑元旦云斗柄才回欲
曙天歲朝風物喜澄鮮閨隨蕢推重年人其梅花老一年
椒酒莫辭元日醉爐香猶篆昨宵烟江城柳色看初動已覺
春光到眼前上元觀燈云羅綺香風拂面來星橋燈火滿樓
臺十分桂魄如春曉萬朵蓮花不水開寶馬傾城金作絡綵
虹匝地錦成堆縱難一聞元宵夜玉漏何須故故催江梅云
東風爲汝洗鉛華又點胭脂學畫家似笑絳桃無骨格却憐
紅杏少橫斜新粧照水窺明鏡薄醉當春闈綺霞蜂蝶未知

芳信早清高到底是梅花余年過六十屢次戒詩而屢有吟
咏因自號詩中馮婦正可對萊榜劉蕢聞者嘖然

余門生談羽儀之孫名晋者年少工詩而累于病遂潛心岐
黃之術其送友云登程偏遇還鄉客拈筆愁吟賦別詩聞笛
云未向江頭尋驛使先聽玉笛落梅花三十自壽云蕭曹勲
貴由刀筆李杜功名非甲科皆有風致而身分亦高

史梧岡好禪不甚作詩而往往有新意游仙云佛函佛笈記
曾談大地如毬繞看三天外有天君到杏梅花都不異江南
水雲凄冷到初冬避盡春來蝶與蜂最是花神不安處海棠
無福見芙蓉他如弱水到今如有力好浮花片海西來且放
蟾蜍光一個與他蝴蝶破黃昏俱可誦

一詩話補遺卷二

五

紀曉嵐先生在烏魯木齊數年辛卯 賜環東歸畜一黑犬
名曰四兒戀上隨行揮之不去竟同至京師途中守符篋甚
嚴非主人至前雖僮僕不能取一物一日過七達坂車四輛
半在嶺北半在嶺南日已曛黑不能全度犬乃獨卧嶺巔左
右望而護視之先生爲賦詩曰歸路無煩汝寄書風餐露宿
且隨予夜深奴子酣眠後爲守東行數輛車空山日日忍饑
行冰雪崎嶇百廿程我已無官何所戀可憐汝亦太癡生後被犬
毒死先生爲冢祀之題曰義犬四兒之墓

余幼時曾見人抄女子趙飛鸞怨詩十九首其人冢本姑蘇
賣與某翁頌家作妾正妻不容改配家奴故悲傷而作首章
云誰隣青鬢亂飄蓬馬上琵琶曲又終嫁得儂夫雙足健漫

言大壻善乘龍味其詞蓋旗斯之走差者也餘詩不甚記憶其最恢諧者如云抗頭不是尋常火馬糞如香細細添俗子不知人意懶揆肩故意唱秧歌

關中史舒堂褒官雲南有句云掬露連衣濕奔泉襍驥鳴山行云斜照垂鞭影輕陰襯馬蹄頗能寫行役之意因運銅過白下投詩一冊而去

余十二歲與張星指應辰侍郎全受知于王交河先生入泮張後爲翰林前輩今六十四年矣其子雲叟孝廉以遺稿索序錄其督學江西夜坐云丁冬遽響到簾櫳何處鳴號萬竅風夜色似年難得曉燈光如豆不成紅沉憂觸撥千端集舊事雲烟一笑空餓鼠繞床揮不去睡鄉未許夢魂通其他佳

詩話補遺卷二

六

句如簾影日移直樹枝風撼鳴綠樹鳥棲連影動好花風送隔林香樹外青山才一角屋頭明月恰當中最貪早起通宵月先看黃河隔片山皆集中精華也

余與吾鄉柴行之同庚十八歲時柴與其表兄張靜山見訪珊珊玉貌彼此剛嬉致相得也逾年張待其尊人官平陸署中離桂林二百里余雖到廣西竟不得見從此永訣今年在西湖靜山之女因余係父執與女弟子孫碧梧姊妹到湖樓相訪談論之餘方知故一詩人也有病起一首云風逼簾櫳睡起遲春寒無計可支持雙眉慵掃因新病一卷叢殘剩舊詩雪霽旋梅初破凍日長提柳暗抽絲年來憂思憑誰訴獨有粧台明鏡知

杭州汪秋御秀才編祖性惆儻好客其室程慰良女婢女媼
一家能詩屢次書來招余遊西湖而中年抱病遽卒僅其雪
彌勒云搏雪居然堞佛誇白毫現處絕纖瑕雲中瑩衛鬢身
靑翠上玲瓏塔聚沙顯相別開嚴淨界笑拈還有霧淞花日
光應照琉璃室隔盡諸塵寂衆譁又題聽圖云月窟高于絳
樹庭柱叢誰占一枝馨年來我是傷秋客每遇秋風最怕聽
張星指先生弔韓蘄王云卧虎早能知俊傑跨驢誰復識王
公或咏淮陰侯云早知結局終烹狗悔不功成再釣魚兩用
典作對其巧相似

考據之學離詩最遠然詩中恰有考據題目如石鼓歌鐵券
行之類不得不徵文考典以侈侈隆富爲貴但須一氣呵成

詩語補遺卷二

七

有議論波瀾方妙不可銖積寸累徒作算博士也其詩大概
用七古方稱亦必置之於各卷中諸詩之後以備一格若放
在卷首以撐門面則是張屏風床榻于儀門之外有貧兒驟
富光景轉覺哂矣聖人編詩先國風而後雅頌何也以國風
近性情故也余編詩三十二卷以七言絕冠首蓋亦衣錦尚
綉惡此而逃之意

丹徒文子王碧雲瓊年未笄而能詩與其兄賦掃徑三菊殘
三徑頗徇楓葉飄丹積滯苔正欲有心呼婢掃那知風過替
吹開頗有天趣又鳥語亂殘夢雞聲送曉風夕陽不在山春
烟生木末俱佳夢樓侍講之女孫也

余少時咏落蕊云此去竟成千弟子湯敬輿和云落去儘憑
古恨好春還待一年看弟子湯敬輿和云落去儘憑

童子掃飛來還望主人看余大嘆賞以爲青出于藍

廣信太守張竹軒朝樂見訪自誦其無題云小院落花初過

兩空樓歸燕又斜暉若非鸞鏡應無匹或對芙蓉竟有雙闌

中雜咏云紅了桃花綠了水春光不管未歸人俱妙江西有

疑獄控部者奉旨交制府審辦疊訊不服其因云得見張

某官來因死無怨已而公果從都中來爲平其事方知循吏

故是詩人

曹星湖明府詩清新可喜近蒙寄示錄其佳句云竹聲隨雨

至花影送晴來霜濃皴地面樹禿減風聲花是當廳左密種

草非礙道莫輕及皆可存也余性伉爽坐車中最怕下簾曹

有句云平生眼界嫌遮蔽風雪何妨一面當與鄙懷恰合

正雨話補遺卷之二

六

嘉興吳澹川因病揚州其族弟魯暮橋親爲稱藥量水澹川

贈詩有生我父母知我子骨肉待我救我死之句亡何來金

陵誦暮橋佳句如愁多甜酒苦客久故鄉生花影殿春色雨

聲生夏寒雲影溪留住秋聲雁送來皆倩秀可喜又見贈云

詞臣循吏老烟蘿天遣湖中付嘯歌官似樂天辭政早仙如

列子出遊多千年蠹飽神仙字四季花開安樂窩想見日餐

雲母粉不知江上有風波

程藹人孝廉元吉晴鳳太史之子年少亡詩咏蝴蝶云小雨

苔痕新掠過午晴花氣亂飛來卽事云蒲院秋聲催落日一

庭黃葉聚詩人

王子春余在杭州錢塘曹江廬明府以小照屬題卷中詩甚

多餘獨爰吳嵩梁一首詢之云是西江高才生也癸丑春王
詩亭給諫書來云有詩人吳某南來索書爲介余大喜掃榻
待之又遲半年始從揚州來人果個儻竟不舉筆以告裘文
達公公笑曰錢香樹家狐罔應稍雅

京城李某以販棗往來於隣縣私誘居停主人少婦歸比至
家其妻先已偕人逃自詫曰幸攜此婦來不然釀矣計其妻
遷賄之期正當此婦乘垣之日既而此婦不樂居農家復隨
一少年遁始茫然自矢後其夫踪跡至京城欲訟李李以婦
已他去無佐證堅不肯承聞里有扶乩者衆曰盡質於仙仙
判詩曰鴛鴦夢好兩歡娛記否羅敷自有夫今日相逢須一
笑分明依樣畫葫蘆其夫默然徑返兩邑接壤有知其事者
曰此婦初亦其夫誘來者也

詩話補遺 卷二

十九

有乩仙自稱卧虎山人不言休咎惟與人唱和詩詞亦能書
畫不過蘭竹數枝而已一絕云愛殺嫣紅映水開小隨白鷓
一徘徊花神莫怪衣襟綠繚藉莓苔穩睡來又詠舟限車字
詠車限舟字舟曰淺水潺湲二尺餘輕舟來往與何如回頭
岸上春泥滑愁殺疲午蒲築車車云小車輻輳駕烏牛載酒
聊爲陌上遊不羨王孫金勒馬雙輪徐轉穩如舟
益都朱天門言甲子夏與數友夜集明湖召妓侑觴飲方酣
妓素不識字忽援筆書一絕句曰一夜瀟灑雨高樓怯曉寒
桃花零落否呼婢捲簾看擲一夜之前是人觀訖遽變色仆
地頃之妓蘇而是人不蘇矣後徧問無有知其故者

杭州胡滄來濤隱于橋頭史之術詩筆甚清余每到杭州必相欵洽不幸年未五十而亡錄其車遙遙云別酒初行第一尊征夫結束車在門別酒匆匆三酌返征夫出門車上坐天涯萬里車遙遙山程驛店柳花飄向暮停車侵曉發人在車中長白髮依依相伴不相離唯有車前故鄉月勿恨當時造轂人行與不行由君身門前芳草年年長幾時草上歸輪響其他佳句如雪共菴云夕陽明似畫僧貌古于松雪霽云山容帶粉消難盡簷淚如珠滴未乾湖上云湖波驟長連宵雨山霧徐收過午風落葉云辭柯早帶新霜色委砌空含舊雨情俱極清妙置之樊榭集中幾不可辨

孫碧梧女子有句云簷前綠墮薦偷果簾外紅翻燕掠花張

詩話補遺卷二

二十

瑤瑛女子有句云蟲飛成陣知春暖花瓣穿欄識暮春二人風調相似

張嫁玉甥健筭甥來隨園張在家聞子規云小院春深綠樹肥聞人任爾自高飛渡江休去歌新曲尚有秦淮客未歸又有句云野店未過先見旂茅菴將近便聞鐘守貧似病醫無益習靜如禪悟却難九月桂云瞥見有花疑八月遲開故意近重陽俱可傳也

有人以某巨公之詩求選入詩話余覽之倦而思卧因告之曰詩甚清老頗有工夫然而非之無可非也刺之無可刺也選之無可選也摘之無可摘也孫興公笑曹光祿輔佐文如白地明尤錦裁爲負版袴非無文采絕少剪裁是也或曰其

題皆莊語故耳余曰不然筆性靈則寫忠孝節義俱有生氣
筆性笨雖咏閨房兒女亦少風情

康熙間叔父健磐公訪臧鎮江寓某鐵匠家與其妻張淑儀
有文字之知彼此暗投箋札唱和甚懽而終不及于亂微言
挑之則正色曰妾故老秀才某之女幼嗜文墨父亡爲媒者
所誑誤嫁賤工一字不識彼方熾炭我自吟詩爲此爵匕得
遇君子聆音識曲使我幾句荒言得傳播于士大夫之口足
矣至于情欲之感發乎情止乎禮義可也再三言則涕泣立
誓以來生爲訂健磐公心敬之不忍強也歸家後誦其佳句
云嬾妝掠髻易私泣拭痕難送健磐公歸云三月桃花憐妾
命六橋烟柳夢君家逾兩年再過京口訪之則鐵舖不開全

詩話補遺卷二

三

家不知何往矣後二十年在粵中又遇一劉鐵匠者不能作
字而能吟詩每得句教人代寫月夜聞歌云朱闌幾曲人何
處銀漢一泓秋更清笑我寄懷仍寄迹與人同聽不同情健
磐公常笑謂余曰同一鐵匠也使張女當初得嫁劉某便稱
嘉耦矣

客冬香亭在杭州歸得詩一冊示余湖樓觀雪云壓白萬山
巔靛黑一湖水余以爲首句人人能道次句古人所無非親
歷者不知又樹隱放湖寬五字亦妙

錢唐陳文水孝廉設帳於香亭家性愛苦吟詩境高潔爲
錄其吳山西爽閣云傑閣憑虛起登臨好是閒涼秋半城樹
殘雨一湖山道侶淡相對詩人去不還江聲樊榭俱茲遊太

寂寞竟徑返柴閨湖村晚步云幾折湖村路身閒興自幽蟲
聲多在草野色半依樓樹有瓜棚倚池惟菱葉浮農人荷鋤
返三五話涼秋題天竺寺云求心不可得慧曰正東升澗道
百泉響山光一路清偶因松篁轉忽見宮殿生八拜觀音像
無言恰有情又殘雨飛遙甸晴雷走斷雲我持一筇逸山爲
六朝忙皆佳句也或云爲字改笑字更有味

金陵張香岩秀才培以秋雨齋詩見示年甫弱冠而詩筆甚
清晚過通濟寺云半壁殘秋月藤蘿繞寺斜颺颺驚客至踏
落數枝花懷秦楊香云皓月入千里清風酒一樽無端下林
葉深夜暗敲門夜夢遊秦淮云雨餘山色浮天遠月下潮聲
泊岸多醉後不知身是夢半橋疎柳聽漁歌其人玉貌珊珊

詩話補遺卷二

三

殆亦風情不薄者耶

周青原舍人一家能詩余已錄其室沈氏其子之桂之詩矣
今春其幼子之桐亦以詩來殆不減謝家昆玉也和鈕牧村
元夕招飲卽送赴皖上云移賓作主是今朝綠酒行珍折柬
邀江館雪泥傳彩筆桃花紅雨送春潮箭吹驪唱成三弄月
滿瓊樓第一宵笑指烟江襟帶水皖公山色正相招余愛其
音節清蒼其他如江空風任來三面舟小人如聚一床真能
寫坐小船光景立秋云日斜殘暑催應去人瘦新涼得更多
明妃怨云妾未承恩想報恩女兒身願犯邊塵只憐照影黃
河水恰比君王照妾真就館邦江其主人非解文墨者又有
句云百卷書堆繡閣寬放園花事未闌珊如何苦抱湘靈瑟

來向齊王殿上彈莊穆堂有押床字句云岸平山似排下仙
過僧寺見山水一幅上題云鴛鴦湖上惜無山烟雨樓頭獨
倚闌兩眼放開無著處不如自己書來看其人姓陳名情不
知何許人也

長洲女孟文輝適震澤秀才王慕瀾詩思清妙今錄其秋口
云遠樹蟬聲秋意濃卷簾拂拂度金風繡餘無事消長夜獨
數秋花深淺紅秋夜云秋夜月明風細淡淡碧雲天際此時
無限愁心那更莎蟲鳴砌比榻羲皇夢醒南山雨過雲停一
派洞庭秋色清
月透疎檣俱妙甲辰春余過南昌讀謝太
史蘊山題姬人小影詩而愛之已采入詩話矣忽忽八九年
先生觀察南河余寄聲問安并說佳人消息先生答書云姬

詩話補遺卷二

三

姓姚姚英字雲卿吳縣人而姬媿賢淑持家之餘兼通
書史姚復初齋看桃花云何須種移海遠求錦浪掀空艷欲
流綠綻枝頭風乍暖紅華簾外雨初收仙源只許劉郎問佳
實帝容曼倩偷類面他年作光悅花前暗囑一樽酬遊百花
洲云小苑墻低弱柳長綺羅香散綠池塘花洲一曲吳江夢
彷彿風迴響屢廊姑蘇上塚云不到山塘十五年舊時女伴
話依然雙親奠酌悲泉路一弟零丁又各天清江卽事云碧
雲暮合望儂來官舫銀燈驛路催底事多愁兼善病探春嬾
上禹王台不信前身是月華浮雲夫婿宦爲家廿年行遍江
南路又看淮孺雪作花夫人無子爲先生納簪室盧氏生一
子而躬自撫養之故先生掌教白鹿書院以詩寄云米監麥

雜必躬親那得偷閒寫洛神小婦持家如大婦故人織素勝
新人十年出入肩常並百里雲山夢更真屈指歸期槐夏過
雲香罨看擁桂輪新余按莊姜因無子而美愈彰馬后因無
子而賢愈顯有子無子何須掉罄余幼有句云花如有子非
真色詩到無題是化工又云脉望成仙因食字牡丹無子始
稱王

詩話補遺卷一

隨園詩話補遺卷三

倉山居士

辛亥端陽後二日廣西劉明府大觀袖詩來見方知官桂林
十餘年與比部李松圃岑溪令李少鶴諸詩人皆至好也席
間談及廣西官況清苦獨空天保三年爲極樂世界其地離
桂林二千餘里乾隆四年改土歸流方設府縣歲有三秋獄
無一犯每月收公牒一二紙胥吏辰來聽役午卽歸耕縣中
無乞丐倡優盜賊亦不知有擣蒲海菜綢緞等物養廉八百
金而每歲薪米雞豚皆父老兒童皆負以供月下秧歌四起
方知桃源風景尚在人間劉率郡人種花云鋤雲植嘉卉人
力助天工此樂真吾有分春與衆同暮烟生逐水樵唱散逆

詩話補遺卷二

空領得山中趣橫琴坐遠風甘棠渡云渡頭溪水繫漁船細
雨濛濛叫杜鵑花片打門春已暮牧童猶枕老牛眠

吾鄉安樂山樵著燕蘭小譜皆南北俗人之有色藝者蓋在
古人南部烟花錄北里志之外別創一格余采一二以備佳
話其節義可風者如張柯亭爲某明府所暱某以罪被誅柯
亭在戲場奔赴市曹一慟幾絕詩美之云樹覆巢傾事可哀
感恩相伴逐輿臺不知金鳳分飛後曾爲東樓一慟來徐雙
喜身長嘲之云阿那多姿柳帶牽臨風搖颺玉樓前若教嫁
作曹交婦縱不齊眉也及肩嘲留鬢而復刺者云兒童瞥見
多相笑西子麻胡面失真贈最佳者云如意館中春萬樹一

時都讓薔櫻桃

趙秋谷有海樞小譜半載天津妓名贈仙姬八首最佳摘其尤者云晚涼新點麴塵紗半月微明絳縷霞不忘當筵強索飲春腮初放小桃花新蟬書書送斜陽小蝶翩翩過短牆記得臨行還却坐滿頭花映讀書牀

孔子論詩但云興觀羣怨又云溫柔敦厚足矣孟子論詩但云以意逆志又云言近而指遠足矣不料今之詩流有三病焉其一填書塞典滿紙死氣自矜淹博其一全無蘊藉矢口而道自夸真率近又有講散調而囿平點仄以爲譜者戒蛸腰鶴膝疊韻雙敲以爲嚴者栩栩然矜獨得之秘不知少陵所謂老去漸於詩律細其何以謂之律何以謂之細少陵不言元微之云欲得人人服須教面面全其作何全法微之亦

詩話補遺卷三

二

不言蓋詩境甚寬詩情甚活總在乎好學深思心知其意以不失孔孟論詩之旨而已必欲繁其例狹其徑苛其條規桎梏其性靈使無生人之樂不已僂乎唐齊已有風騷旨格宋吳潛溪有詩眼皆非大家真知詩者

乾隆辛未余送黃文襄公至浦口見隨行一員疑爲把總與之談方知戊午同年姓福名安字仁山品端而性爽遂成莫逆累官至贛南道率其幼子來隨園作別余止而觴之嗣後不通消息矣庚戌春間余掃墓杭州歸見几上有詩扇一柄云是祭陵 欽差圖大人留贈初不知爲誰關札方知卽當年福公之子圖敏字時泉官禮部侍郎事隔四十餘年尙能念舊欲修書作謝而公竟卒於路爲淒然者久之扇上詩云

憶昔兒時此地過卅年重到髣髴先生歸日應驚笑來唱
皇華卽是他乾隆庚戌金陵風雅於斯爲盛吾鄉孫補山宮
保爲總督滄州李寧園翰林爲知府涇陽張荷塘孝廉宰上
元遼州王栢崖廩生爲典史西江陶瑩明經爲茶引所大使
盱眙毛俟園孝廉爲上元廣文隨園唱和殆無虛日諸公詩
話中已採入矣近又得俟園遊邢園一絕云一溪春水一
橋橫寵柳嬌花夾岸迎儂自過橋閒處立放開來路讓人行
此所謂詩外有詩也俟園因余爰誦其詩故見贈云水惟善
下能成梅山不矜高自極天又云誰云智慧能消福不信窮
愁始著書

王春溪明府在濟南三月三日與李子喬諸人夜泛大明湖

詩話補遺卷三

三

分得南字王吟云久客風塵倦今宵酒意酣相隨賢有七剛
值日重三新月如鉤上明湖似鏡涵濛濛烟水裏幽夢到江
南子喬讀而笑曰君得毋將官江南乎已而果選新陽人驚
爲詩讖戊申入關齒痛有句云易牙思妙術鑿齒鮮良方一
時王司廉官俱稱其典雅

近時兄弟怡怡者多不概見休寧戴友衡孝廉咏黃山連理
松云獅子峯前連理松柯交葉互碧重重爲憐固氣難分割
縱使風來不化龍殊有寄託又江上竹枝云欲雨不雨江上
霞青宿茅屋酒人家長年鬪漿不歸去後月一叢蘆蒿花亦
頗清妙惜采中年遽亡其師吳竹橋太史爲余誦之

瀟湖令陳岸亭湛深禪理詩故清曠綠其憶梅云春心忽忽

在花先盼到花時倍惘然一夜黎雲空有夢二分明月已如
烟傳來芳訊知何日別後婢娟近一年愁絕西溪三百樹冷
香飛不到意前巡遍簷牙十二時紅羅白紵渺難知相思雪
海應同漲一箇江城忍便吹何遜官忙開閣少陸郎路遠寄
書遲斷烟細雨相思苦擬作逋仙寄內詩

詩家百體嚴滄浪詩話臚列最詳讀東坡山谷詩如子路見
夫子終有行行之氣此詔解頤卽我規蔣心餘能剛而不能
柔之說也然李杜韓蘇四大家惟李杜剛柔參半韓蘇純剛
白香山則純乎柔矣

陳去非云楊子雲好奇惟其好奇所以不能奇陸放翁云後
人不知杜詩所以妙處但以有出處爲工其去杜也愈遠余

詩話補遺卷三

四

愛二人之言故摘錄之

東坡詩云惆悵東闌一枝雪人生能得幾清明此偷杜牧之
砌下梨花一堆雪明年誰倚此闌干句也然風調自別有人
說歐公好偷韓文者劉真父笑曰永叔雖偷恰不傷事王亦
妙語也

晁以道問邵博梅二詩何如黃九邵曰魯直詩到人愛處聖
俞詩到人不愛處其意似尊梅而抑黃余道兩人詩俱無可
愛一粗硬一平淡

盧仝月蝕詩有官爵及董秦之句人疑藩將董秦來降賜名
李忠臣現在貴官盧仝不應譏之姚寬西溪叢話以爲董秦
者漢之幸臣董賢秦宮也此說似有理

癸卯春余遊黃山見絕壁之上刻汪麗田先生彈琴處疑是古之仙家者流不復相訪今辛亥三月間宣州恭戎楊公大雅同一琴客江某來道其姓氏蓋卽麗田先生余驚喜往訪見骨格清整白鬢飄然隱天都峯下五十餘年終身不娶有貴客過者必踰垣而避洵異人哉楊誦其咏古梅云托根幽谷不知年霧鎖雲封得自全蓋自況也楊與之過陵陽作絕句云山城重駐有前緣再到陵陽二月天笑指宦囊無別物一船書畫一神仙余刻詩話尺牘二種被人翻板以一時風行賣者得價故也近聞又有翻刻隨園全集者劉霞裳在九江寄懷云年來詩價春潮長一口春深一日高余戲答云左思悔作三都賦枉是便宜賣紙人

詩話補遺卷三

今州縣大堂有戒石箴曰爾俸爾祿民膏民脂下民易虐上天難欺人但知爲宋高宗語也後讀張端義貴耳集方知是蜀王孟昶語本二十四句而高宗摘取之猶云清慎勤三字今奉爲聖經賢傳而不知司馬昭訓長史之言見三國志余在冰陽署中賦落花詩已五十四年矣今秋門人方甫恭携其尊甫碧灣居士詩來蓋當時和余之作中一首云獨對園林感不支殘紅零落滿階墀明妃曲唱離鄉日金谷魂消墮地時一夜雨偏添別恨數聲鶯尙戀空枝殷勤好向風前約莫負春來隔歲期又玉漏秋聽三月雨金鈴誰護五更風山鳥解人憐惜意故舍花片往來飛皆佳句也讀之想見其爲人在當時不急急以詩來見其高雅可知甫恭在余門二

十餘年亦遲至今年七月方袖詩來豈非風騷頭晦亦有一
定之時耶先是碧澗弱弟子雲以詩受業余門尙在甫叅之
前亦未言及乃兄之能詩余詩話中載子雲詩甚多今裁知
其淵源有自云碧澗諱正溶新安人

香奩詩至 本朝王次回可稱絕調惟吾家香亭可與抗手
錄其無題云迴廊百折轉堂坳阿閣三層鎖鳳巢金扇暗遮
人影至玉扉輕借指敲敲脂含垂熟櫻桃顫香解重襟豈蕊
梢倚燭笑看屏背上角巾釵索影先交一簾花影拂輕塵路
認仙源未隔津密約夜深能待我喫虚心細善防人喜無鸚
鵡偷傳語到有流鶯解惜春形跡怕教同伴妒囑卽見面莫
相親碧桃花下訪臨卽含笑開門有病容帶一分愁情更好

詩話補遺卷三

六

不多時別興尤濃枕衾先自留虛席衣釵遲卽解內重親舉
織織偎頰看分明不是夢中逢惺惺最是惜惺惺擁翠偎紅
雨乍停念我驚魂防妨覺教卽安睡待奴醒香寒被角傾身
讓風過窻櫺側耳聽天曉餘溫留不得隔宵密約重叮嚀其
他佳句如他日悲歡憑妾命此身輕重恃卽心常防過處留
燈影偏易行來觸琴轂勸君莫結同心結一結同心解不開
皆妙余戲謂詩中境界非親歷者不知然阿兄雖親歷亦不
能如此之細膩風光也

近又見語庭張觀察亦工此體無題云真珠樓翠倚香帷赤
玉闌干白玉墀人與桃花爭一面春將柳葉鬪雙眉画裙繡
鳳晨風舉寶鏡盤龍夜月移珍重瀛壺無限好文鴛端合占

瓊枝每從夢裏說相思夢好翻嫌入夢遲去後情懷憑酒遣
來時歡喜有燈知羊權縮地真無術張碩逢仙更有期一樹
天桃濃着色梳粧樓上繡簾垂其他佳句如常啟鏡奩如對
月應知蝶夢不離花不敢當庭愁月掩未曾却扇怕花羞水
搖髻影疑釵墜身比花香惹蝶親

觀察又有山牕一絕云空階入夜雨蕭蕭剔盡銀燈漏轉造
爲怕客中聽不得小窓先日剪芭蕉亦七絕中之姜白石也
觀察名裕穀中州名臣儀封先生之曾孫

梁山舟侍講以書名重海內余過其家見箋絹囊滿兩屋余
笑云君須有彭祖八百之壽才還清此債梁爲一笑賦詩
自獻云誓墓歸來王右軍暮年都付代書人小生那敢希前

詩話補遺卷三

七

哲只合從人役苦辛可笑塗鴉逾四紀半生白曰此中類書
家縱有凌烟閣耻把千秋托麝煤我自無心結蛇蚓錯傳帛
隄五雲如世問到底無真賞認煞題名一字書從來得失寸
心知無佛稱尊或有之未必西家勝東宅却教屈了效顰施
手未支離眼未昏業緣欲斷竟何因從今誓齧工倅指懶作
供官設客人語似謙而實傲

吾鄉多閨秀而莫盛于葉方伯佩蒸家其前後而夫人兩女
公子一兒婦皆詩壇飛將也先娶周夫人曠清甲戌聞捷云
雙眉欲展意猶驚起聽銅鈺屋外敲不惜雕梁馴乳燕泥金
帖子挂題名秦家上計動經年閨夢何由向日邊今日離情
暫拋却知君身到大羅天春蠶詞云蠶生戢戢滿庭隅但願

驅無鼠也無犬婦裏塩呼小婦前村趁早聘狸奴典衣買菜
不論錢要趁晴明乍暖天却似靈和殿前柳春來三起又三
眠令阿細入學云低鬟憐阿姊與汝亦齊肩且令拋針線相
隨共簡編雙行知宛轉坐咏爰清圖試看俱成誦令朝若个
先其他佳句如柳門卽景云擣杏新添調酪椀嘗瓜不惜買
水錢百夏云花因辭樹偏多態鳥爲催香已變鼓夏日卧病
云小倦何心燒白米薄陰有信近黃梅柳綿云乍從野水官
橋見只傍鞭絲唱影飛

繡娶李夫人

舍章

刺繡詞云朝繡長短橋暮繡東西嶺生不

識西湖道是西湖景羅稀不受針織密不容線繡好有人知
繡苦無人見夏書云午樓風暖試輕紗語燕敲中口未斜滿

詩話補遺卷三

八

地綠陰簾不捲游絲飛上蜀葵花長沙節署感賦云廿年咏
絮鳴環地今日隨君幕府開時外職回閣乍迎新使節春風
猶憶舊粧臺殊恩象服慚難稱遺愛棠陰待補栽聞道江城

輿頌美如水樂合又童來

大人爲吾同年李鶴壽之女鶴
峯曾撫湖北故有感而作也

萬

固寺云山寺不知路忽聞流水被溪隨巖石轉塔與白雲平
古水上無際幽禽時一鳴松根堪小憩試汲碧泉清題李白

詩後云千仞翔孤鳳高歌一代中在天猶被論入世豈能容
胆落高驃騎恩深郭令公再回唐社稷諸將莫言功望極兒

不至云濟南秋八月接汝數行書報說重陽日能迴上谷車
已驚楓落後又到雪飛初何事歸期誤臨風一倚問三篇皆

一氣呵成真唐人高手也其佳句如咏始皇云重載輶輓山

有鬼舟行縹渺海無仙望岱云海外天光明野馬寰中人影
動蜉蝣並頭惠蘭云風靜謝庭群從集月明湘浦二妃歸重
至都門云每慙舊遊疑隔世暫休征旆當還家常州道中云
路已近家翻覺遠人因垂老漸知秋又兩兒下第云得失由
來露電如老人爲爾重踟躕不辭羽鏃三年翻可有光分十
乘車四海幾人雲得路諸生多空整潛魚當年蓬矢桑弧意
豈爲科名始讀書見解高超可與三百篇並傳矣

其女公子令儀

春陰云碧窓人起怯春寒小立閒庭露未乾

牆外杏花階下草引人長倚碧闌干舟夜云小艇低昂睡不
成夜深猶自促歸程蒲意涼月白于雪船底忽聞魚鱗聲初
夏偶成云躑躅花開暮雨餘送春天氣此幽居棋枰半取殘

詩話補遺卷三

九

箋補詩草時尊退筆書節序開心殊苦樂韶華過眼有乘除
年來怕上蘇堤望愁見垂楊綠映裾其佳句如村景云帆影
多從意隙過溪光合向鏡中看偶成云多病階前時晒藥畏
寒廳外亦垂簾

其長媳

生吾鄉陳句山先生之女孫也春曉云翠幕沉沉

不上鉤曉來怕看落花稠紙窗一線橫斜裂又放春風入畫
樓太真春睡圖云秘殿春寒倚繡茵君前底事效橫陳馬嵬
更有長眠處也傍梨花一樹春寄外云弱歲成名志已違看
花人又阻春闈兩上春官以迴避不得與試縱教裘敝黃金盡敢道君來
不下機頻年心事託冰紉絮語頻君仔細看莫道閨中兒女
小燈前也解憶長安春日信筆云耿紅無數欲成泥庭草催

春綠漸齊意外忽聞鸚鵡說風箏吹落画簷西春園偶賦云
賣鷄穀裡日初長春滿閒庭花事忙樓外軟風鶯夢暖籬邊
疎雨蝶衣涼碧桃重似垂頭睡紅蕖殘如半面粧看盡韶光
應不倦題詩長倚小迴廊其佳句如硤石道中云樹逐作人
立山深疑雨來春夜云濕雲壓樹暝烟重淡月入簾花氣幽
聞家大人旋里云去郡定多避道吏還山已是杖鄉人
余舊咏西施有云妾自承恩入報怨捧心常覺不分明白道
得題之間載入集中今讀陳夫人題捧心圖云眉鎖春山歟
黛痕君王猶是解温存捧心別有傷心處只恐承恩却負恩
與余意不謀而合

方伯次媳周星薇亦工吟咏少年早天以故詩多失傳僅錄

詩話補遺卷三

十

其悼鸚鵡云羽毛纒京懷奇霜敲斷銀環恨渺茫連日誦經
知有意昨宵說夢已非祥綠衣原自藏金屋丹詔何年下玉
皇應伴飛瓊充鳥使綵霞深處任廻翔陳夫人之妹沒宜亦
工詩都中寄姊云鴿原分手隔天涯風雨聯床願尙餘兩地
空煩詩代簡三春祇有夢還家病多漸識君臣藥別久愁看
姊妹花他日相思勞遠望五雲深處是京華

聞其方伯精不易理不屑爲詞章之學然偶爾揮毫皆超雋

不凡有雁字二十首爲尹文端公所賞錄三首云綠章可待
乞天公箋奏遙傳碧落中不斷數行如曳白有何羈怨慣書
空料陽關肯金泥燦霽雪梳翎玉筋工最是閉山飛欲倦數
行小草最匆匆來憑月劫去風支紀綴春秋特筆甄鴛關聯

班曾視草龍湫絕頂好臨池揮成欲猷凌雲賦過去難摹沒
字碑最後失群餘片影西風吹散碎金詞點染天池付雁王
祇今真種更飄揚將斜復整迴波秀漸遠如無削牘忙體變
八分猶鳥跡天開一画本鴻荒銀河秋老稀鳥鵲錦字重勞
訊報章琴柯公子見贈四律余已梓入續同人集矣茲又錄
其寒山卽事云山寺不知路微聞清磬首松崖春寂寂石屋
書陰陰幽坐見空色寒流無古今披襟成小住祇愧俗緣深
又填金縷卽寫懷云挨過餘醞節怪春來面樓燈影幾番輕
別孤館愔愔簾未捲怕放楊花飛人定添了安仁鬢雪憔悴
天涯人一个料青衫不爲琵琶温思行事計何拙 尋春偶
傍欄干立又侵墻茸細草染成愁碧沾盡落紅三月雨不

詩話補遺卷三

十一

見去年蝴蝶定怪我遊踪未歇幾度問春春不應遣深更杜
宇低低說羈枕畔正愁絕

文公云北人學問如顯處觀月言其博而寡要今之考据家
也南人學問如牖中窺日約而能明今之著作家也世說稱
王平北相對使人不厭去後亦不見思我道是梅聖俞詩王
夷甫太鮮明我道是東坡詩張茂先我所不解我道是魯直
詩

宋太祖曰李煜好个翰林學士可惜無才作人至耳秀才郭
麋南唐雜咏云我思妹妹最神傷予季歸來更斷腸作个才
人真絕代可憐薄命作君王

余好詩如好色得人佳句心不能忘近又得王孝廉芭偶過

行宮賦詩云街子似嫌春不去。明催掃繡毬花方扶南道。
周公瑾墓云一事不如張子布。墓前飛過白頭翁。汪易堂賦
野樹云散才幸免搜林斧。留得青陰與路人。劉梅菴偶成云
小蝶過牆如使至。短筇在手當孫扶。又曰通宵玩月寧知旦
排日聞歌直到秋。吾鄉王星望先生有句云蕭綱斷酒二百
日王負長齋十一年。

孟子曰盡信書不如無書。此是晚年悟道之言。若早見及于
此。則指階焚廡。舜不告而娶之說。俱付之齊東野語而已矣。
卽如葛伯以七十里諸侯而奪童子之黍肉。此是惡丐行徑。
湯遣一小卒擒之足矣。安用起兵以征之哉。余嘗謂書中最
可信者莫如尙書論語。然尙書開口便稱粵若稽古帝堯。則

詩話補遺卷三

十二

其相隔必有千百年。若相離不遠。史官必不稱粵若稽古。康
熙稱古順治也。論語稱陳成子。魯哀公都是孔子亡後百十
年後追述。其言能無所見異詞。所聞異詞之慮哉。一管仲也。
而忽貶忽褒。若出兩口。子路行見丈人。至則行矣。子路不仕。
無義一節。說話是向何人。饒舌亦猶趙盾假寐。鉏麇觸槐。死
矣。所嘆不忘恭敬等語。是何人聽得。師曠瞽矣。何以見王子
晉。火色不壽。此種疑竇不一。而是故嘗有句云雙眼自將秋
水洗。一生不受古人欺。

海虞女子吳靜定生氏。嫁項生肇基。而寡。婦居戶自經。姑救
之曰。我在汝不得死。婦泣而誌之。越二年。姑亡。婦又自經。叔
母救之曰。姑與夫未葬。汝不得死。婦乃復生。遂折家財爲三。

分其叔季堊鼻姑與夫而不食死年二十六婦生時好觀綱
繼吳竹橋太史爲之立傳錄其咏史云不學何須詆霍光託
孤寄命報生王匡張孔馬多經術青史于今若箇芳更有名儒
莽大夫紫陽書法勝南狐當年奇字人爭問曾識綱常二字
無

蔣心餘太史自稱詩仙而稱余爲詩佛想亦廣大教主之義
弟子梅冲爲作詩佛歌云心餘太史不世情獨以詩佛稱先
生先生平生不好佛攢眉入社辭不得佛之慈悲罔不包先
生見解同其起佛之所到無不化先生法力如其大一鼓忽
作獅子吼喝破炎摩下方走天上地下我獨尊雙管鬼毫一
隻手人間遊戲撒金蓮急流勇退全其天小倉山居大自在

詩話補遺卷三

七

一吟一咏生雲烟有時披出紅袈裟南天門邊縛夜叉八萬
四千寶塔造天魔龍象爭紛拏有時跌坐如善女低眉微笑
寂無語天外心從何處歸鵲巢于頂相爾汝眼前指點說因
由千山頑石皆點頭三唐兩宋攝其總四大海水入毛孔一
心之外無他師六合以內皆布施先生卽佛佛卽詩佛與先
生兩不知我是如來大弟子夜半傳衣得微旨放膽爲作詩
佛歌願學佛者從隗始

金陵小市買得水精方印縱橫二寸七分上鑄十六字云好
學忘老存心對天行樂一世傳名千年印質不其瑩徹而陽
文篆書甚蒼勁語句亦可愛

洞庭山人徐堅字友竹工丹青篆刻兼能詩與余交三十餘

年矣今春相遇姑蘇以親園詩見示紅橋暮泛云春風一權
者烟開雨洗平泉淨碧苔薄暝花光亂松竹夕陽人影散樓
臺隣船歌吹移燈去野店魚蝦入餼來轉眼寒梅便零落共
拚酌酒莫催回東行云驅人名利路何窮嘆息勞勞來在回
取次相逢不相識鞭絲帽影各匆匆抵家云換得輕舸越詩
閑此身真不到家山家山畢竟風光好久住人偏看等閒其
他佳句如秋風不顧征衣薄夜雨還同別淚多此際柴門深
夜火幾人團坐望歸人

友竹與秋帆尚書室好又嘗小住揚州汪令聞家汪故余戚
也爾時宴飲酣嬉髮無二色而今則彼此皤然年垂八十矣
班荆道故不覺凄然其族姪龍飲尤聰俊賞鑑書畫一時無

詩話補遺卷三

十六

而不幸中年化去其詩亦散失但記其無子警句云空費醫
錢九千萬阿嬌金屋總無兒

白下秀才司馬章字石圃風神瀟灑年少多情與周麟官校
書有三生之約而格于家範乃撰雙星會曲木以舒結轎余
錄其辛亥記遊浪淘沙云春到鳳城中遊運方通閒來指點
過橋東記得當時心醉處蛛網塵封

人去翠樓空聚散匆匆今年花似舊時容可惜如花人已去
欲折誰同又南柯子云渡口傳桃葉溪頭說范雲笑他街市
語紛紛都把文郎情事作新聞心結愁千縷人歸瘦幾分
內人不解問殷勤今日眉頭重個爲誰顰又臨江仙云午睡
昏沉偏恣枕夢魂尋到天涯幾回夢得到卿家知郎新病渴

親試六班茶 飲笑問儂何好事 將人譜入琵琶囔囔低語
怨郎羞覺來嫌菱短紅日已西斜

老友何獻葵刺史喜談詩而不輕作常云詩無生趣如木馬
泥龍徒增人厭營住隨園得梅子肥時落地輕七字卒亦頗
于成章也其長子春巢工填詞余已載入詩話矣今年獻葵
亡春巢乞余志墓袖近作見示秦淮感舊云十年不作白門
遊忽把孤帆卸石頭聞說舊人都不在春風愁上十三樓迢
迢一水遠通江卽去潮來安倚意羨敘載卽船上漿隨波來
去總雙雙千金亭云空亭千古對平波野渡斜陽獨客過莫
怪無人留一飯報恩人少受恩多贈鈎叟云萍開風起水生
紋一葉飄然泛夕睡魚在綠波竿在手船頭閑坐看秋雲他

詩話補遺卷三

五

如湖邊客到花先笑 樹裡僧歸路半陰 閉雲未必忘舒卷 流
水何曾管是非 兩足田車閑架樹 日斜耕犢穩 獸人肯佳句
也其次子蘭庭懷兒云 遠漏敲敲滴寒宵 故故長迢思千里
客不覺九迴腸 月白鴉翻樹 燈昏鼠墜梁 布衾頻轉側 有夢
到錢唐 重到云門巷 重來認未差 昏黃月色淡 雲遮生憎一
幅湘簾影 不隔鶯般只隔花 放舟云 茅屋踈籬綠水灣 泉般
入澗響 潺湲管師莫怪蒲帆滿 有客推蓬爰看山 其佳句如
插新花似延佳客 讀舊書如遇故人 百歲開懷能幾日 一生
知己不多人 烟不疑積水 燈遠若孤星 俱妙

春巢在金陵得端硯背有劉慈絕句云 一寸干將切紫泥 專
諸門巷日初西 如何軋軋鳴機手 割徧端州十里溪 跋云吳

門頤二娘爲製斯硯贈之以詩顧家于專諸舊里時康熙戊戌秋日後昭顧竹亭云顧二娘製硯能以鞋尖試石之好醜人故以顧小足稱之春巢因調一剪梅云玉指金蓮爲底忙昔贈劉郎今遇何卽墨花猶帶粉花香製自蘭房佐我文房片石摩挲古色蒼顧也茫茫劉也茫茫何時攜取過吳閩

嘯秋

如皋女子石氏學仙

戊辰進士石公爲嶽之女也適彰德太

守沙公次子又文善書畫工琴棋臯邑剪彩貼絨花鳥自學仙始著有冰蓮繡閣詩抄過故居云風迴玉笛夕陽斜誰傍山陽譜落花喜得春回梁上燕不曾飛到別人家荅吳門女子感懷云蘭思蕙怨惺惺語柳絮春風字字新自古傷心同

詩話補遺卷三

十六

此病深愁多付有才人又有能澹仙者幼穎妙解殺律適陳氏配非其偶鬱鬱不樂之意時形詭詭吟咏見蝶云曉露零香紛春風拂回衣輕紈原在手未忍撲雙飛村女云柔桑枝上聽鳴鳩曉起提筐過翠疇借問誰家春夢好半窓紅日未梳頭紅樹云老樹經霜色更鮮半竿斜日影前川漁郎指點烟波外錯認桃源二月天感舊云刺繡餘閒就熟時也從花裏謁名師貪看夜月憎眠早倦挽春雲上學遲琴案屢吟秋柳句錦箋頻寫落花詩而今回憶皆塵夢悵望當年舊重帷調蝶恋花咏刺繡美人云二八紅闌春似水幾日金針拋却奩箱裏貪睡朦朧慵不理驚前鸚鵡頻催起手展繡綉讀着意死譜括來幾朵花爭麗綉到雙飛私自喜背人笑阿紅

窓倚

句容駱氏相傳爲右丞之後故大家也有秋亭女子名綺蘭者嫁于金陵龔氏詩才清妙余詩話中錄閨秀詩甚多竟未采及可謂國中有顏子而不知辛亥冬從京口執訊來自稱女弟子以詩受業遊西湖云渺渺平湖漠漠烟酒樓斜倚綠楊前南屏五百西方佛散盡天花總是蓮春閨云春寒料峭乍晴時睡起紗窓日影移何處風箏吹斷線飄來落在杏花枝雲根山館題壁云寂寂園林日未斜一庭紅影上窓紗至人難免花枝笑如此開時不在家對雪云登樓對雪懶吟詩閒倚闌干有所思莫怪世人容易老青山也有白頭時四首一氣卷舒清機徐引今館閣諸公能此者問有幾人

詩話補遺卷三

十七

山左任城東關外有泉相傳李白浣筆處也上有祠堂祀太白及賀監少陵三賢乾隆辛亥沈清齋觀察啟震葺而新之土中得詩碣署木蘭山人劉浦題不知何時人其詞曰蘚蝕殘碑枕廢池開元吟客刺荒祠空庭古柏吹風處秋草寒泉落日時誰采澗毛修冷寺我沽村酒讀遺詩唐宮漢寢無人記獨有才名到處知未幾巡漕使者和希齋閣學入都河帥李香林尙書祖餞于祠中希齋和云太白樓臨杜老池此間合祀有專祠林泉竟屬先生地風雅剛逢我輩時梁繞驪歌將進酒壁留鴻爪共題詩他年重過應相訪直與三公作舊知希齋云當年浣筆有清池此日名泉舊舊祠花竹新栽

遊賞地歌筵初啟餞行時標題不亞羲之序重修浣筆泉和希齋作記廣

韵如吟白也詩文水堂前風月好幾人惆悵爲心知漕帥管

公啓珍云謫仙人去剩空池剔蘚疏泉認古祠官跡已沈靈

武後筆花猶及盛唐時入門合進臨波酒立石重摹出土詩

拊景漫增興廢感好將觴咏記新知中丞惠公齒云女牆東

處甃方池上有雲烟眷古祠誰向寒泉談舊蹟空餘文藻憶

當時低徊不少飛觴飲感慨爭留過客詩拍檻欲狂呼太白

要從曠世結心知進士顧禮號云仙在高樓月在池池光千

載抱遺祠幸逢元老重開宴轉惜先生不並時綠水瀾洄沈

彩筆舊碑林立待新詩吳都狂客今初到未要尋常賀合知

轉運阿公林保云謫仙遺蹟賸荒池合祀于今拜古祠蓋世

才名猶在耳斯人重聚復何時難尋縹緲神仙路誰補蒼茫

詩話補遺卷三

客恨詩愧我毫端麈末沈空憑流水寄心知陳公蘭森云泗

水源流故有池泉開浣筆闢叢祠風雲餘墨入千古仙聖同

龕祀一時勝地從今類集讌殘碑自昔紀題詩漫言興寄形

骸外大雅欣逢畫舊知觀察沈公啟震云源分泗水關方池

座列三賢葺舊祠人地廢興原有數主賓今古宛同時新移

竹影亭前画細辨苔痕壁上詩樽酒落成兼送別高情留與

後來知諸詩俱各清妙輯而存之後世想見 聖世昇平公

卿風雅矣

桐城汪稼門先生云歐陽公醉翁亭連用也字仿唐人杜牧

阿房宮賦開妝鏡也棄脂水也杜牧又仿漢人邊孝先博塞

賦分陰陽也象日月也不知詩亦有之牆有茨三章均用也

字桑扈三章均用矣字樛木三章均用之字緇衣三章均用
兮字又如螽斯三章首句不易一字桃夭兔置皆然漢廣三
章末句不易一字麟趾麕鹿皆然此論古人所未有先生守
蘇州廉殺爲一時冠然公餘不廢吟咏遊棲霞山成六韻云
探幽臨勝地慰我廿年思高節明僧紹鴻文江總持寒雲封
舊宅古蘚覆殘碑佛法青松護泉源白鹿知春催花信早僧
訝客來遲欲採長生菜靈崖有紫芝咏敝帶云人情交久情
愈真肯輕舍舊復圖新凡物閑心亦類此低徊臨別尤酸辛
憶我初年通仕籍帶下雙雙垂影帛左垂刀佩共堅貞右拂
玉環同潔白學製慚無奪錦才戈戈拘束隼繩來但期順下
如流水豈肯隨風着點埃無那星霜歷顛顛神采漸與當時

詩話補遺卷二

十一

異綢繆莫頡繭騰花閨淡徒存雞肋意爲憑染入施力單濃
於河畔草拖藍翻舊從新費裁剪化兩爲一懲奢貪重加矜
惜風塵外相依仍作腰衣帶裙屣風流我自慙腰肢瘦損君
應怪箇中伸縮有誰知蘇州猶似霍州時慙愧香山恩意厚
搜腸難續故衫詩香燧光銷件件寂寂俯視帶垂增閱歷物理
從來有苑枯人心底事勞欣戚溫涼異態春復春惟我與汝
臭味親慙慙什襲藏諸笥留作衰年老故人

鮑步江之女菴香居士名之蕙適丹徒張湖和合刻清娛閣
集丐余爲序舸齋遊廣陵鮑寄云秣陵僧院廣陵船幾日遊
蹤附彩笈懷渴得梅濃較酒詩狂乘興樂於仙二分新月扶
殘醉四美佳辰媚少年珍重宵深風露冷征衫多半未裝綿

張和云卅載休言歲月虛縹緲差擬茂先車髻綵理爲茶煙
溫眉嫵成從墨瀋餘到處勝遊常背汝得來佳句轉先余何
年始踐誅茅願同向湖山賦遂初又卽事云夜雨催歸直到
明草痕新與漲痕平朝曦十里空濛路雙槽飛如小燕輕二
人才調相匹故知秦嘉徐淑不得擅美于前

蒲洲伊小尹

湯安

相國永公之從子幼卽工詩來作江防司

馬春郊卽事云春郊攬轡值新晴騎馬悠悠自在行雪滿溝
塍占歲稔烟浮村落覺寒輕清風似剪能裁柳黃犢初肥好
勸耕猶有村氓知禮數春醪首爲使君傾謝余餽肉云捧來
西子顰俱美製自東坡肉亦尊

西江曹星湖

龍樹

大宗伯地山同年之姪也出知如臯與余

詩話補遺卷三

三十一

未識面而時時以詩往來勸農云九陌千疇繡錯開停輿陰
借綠雲槐羨渠扶杖迎官者白髮飄蕭領隊來農忙翻爲看
官間戴白垂髻喜動顏莫道使君耕未曉使君來也自田間
鴉鬟小女學當家阿母教同坐績麻觸目新紅春似海抽身
偷戴滿頭花桃葉渡云小艇盈盈隔紅樓處處家昔時花映
水今日水流花數首皆有芬芳悱惻之情

乾隆戊午科余與何廣庭相公同出四川鄧遜齋先生之門
榜下一別於今五十四年矣公出將入相以忠勳爵至上公
而余乞養還山賣文爲活先生常向人云我門生不多而一
文一武足勝人千百余聞之赧然哭先生有句云共說師門
原不忝政云文武竟平分詩載集中後公在杭州勾當公事

托今觀察方次耘馳檄見招而余適遊武夷無由進謁今年
冬竒麗川撫軍陸見公在宮門垂問余甚殷竒公於路上
吟一絕見寄云中待傳宣遞膳牌平明待詔立金階自頭寧
相関心甚問了黃河謂簡齋

詩話補遺卷三

